

16

社 1 2 1  
6 7 3  
部 五 : 8 4



文獻通考卷第三百二十八



鄱陽馬端臨貴與著

四裔考五

南

杜氏通典邊防總序曰南蠻其在唐虞與之要質故

曰要服夏商之時漸為邊患暨於周代黨眾彌盛故

詩曰蠢爾荆蠻大邦為讐至楚王時蠻與羅子共敗

楚師殺其將屈瑕莫敖不設備故敗縊於荒谷羣帥囚於冶父楚師復振

遂屬於楚及吳起相悼王南并蠻越遂有洞庭蒼梧

之地今長沙衡陽等郡也秦昭王使將伐楚略取蠻夷置黔中

郡今武陵澧陽及黔中五溪中諸郡地漢興以後時有寇盜其西南諸

夷夜郎之屬悉平定置郡縣今夜郎播州犍為即古夜郎地公孫述

時夜郎大姓為漢保境後漢初從番禺江奉貢光武

建武中武陵蠻帥單程今武陵澧陽黔中寧夷盧溪等郡即漢武陵郡大寇

郡縣漢將劉尚戰敗數歲方平順帝時武陵太守增

其租賦蠻又舉種反殺鄉吏東晉時沔中蠻因劉石

亂後漸徙於陸渾以南徧滿山谷宋齊以後荆雍二

州今荆南江陵郡雍州襄陽郡各置校尉以撫寧之羣蠻酋帥互

受南北朝封爵至後魏末暴患滋甚僭稱侯王屯據

峽路斷絕行旅周武帝遣陸騰大破之其獠初因蜀

李勢亂後自蜀漢山谷出侵擾郡縣至梁時州郡每

歲伐獠以自利及後周平梁益梁漢川益蜀川自爾遂同華

人矣以其黔中東謝西謝自古不臣中國唐貞觀以

後置羈縻州領之

### 盤瓠種

盤瓠種昔帝嚳時患犬戎入寇乃訪募天下有能得犬

戎之吳將軍頭者妻以少女時帝有畜狗名曰盤瓠遂

銜其將軍首而至乃以女配之杜氏通典曰按范曄後漢史蠻夷傳皆怪誕不

經大抵諸家所序四夷亦多此類未詳其本出且因而商略之曄云高辛氏募能得犬戎之將軍頭者購黃金

千鎰邑萬家妻以少女按黃金周以前為斤秦以二十兩為鎰三代以前分土自秦漢分人又周末始有將軍

之官其吳姓宜自周命氏瞿皆以高辛之代何不詳之甚又宋史瞿被收後於獄中與諸甥姪書自序云六夷諸序論筆勢放縱實天下之奇作其中合者往往不減過秦篇嘗共比方班氏非但不愧之而已按班賈序事豈復語怪而瞿紕謬若此又何不減不愧之有乎 盤瓠得女負走入南山在國之南即五溪止石穴中生六男六女因自相夫妻織績木皮染以草實好五色衣服製裁皆有尾形衣裳斑斕語言侏離其後滋蔓號曰蠻夷有邑君長名渠帥曰精夫相呼為媿徒說文曰媿女人自稱媿我也烏朗反所居皆深山重阻人跡罕至長沙黔中五溪蠻皆是也一辰溪二酉溪三巫溪四沅溪五沅溪秦昭王使白起伐楚略取蠻夷始置黔中郡漢興改為武陵郡今武陵澧陽黔中寧夷盧溪歲令大人輸布一疋小郡盧陽靈溪潭陽郡地皆是也

口三丈是謂賓布

說文曰賓南蠻賦之冬反

雖時為寇盜而郡國討

平之後漢光武建武二十三年十二月武陵蠻精夫相

單和等大寇郡縣遣武威將軍劉尚發南郡

今江陵巴東夷陵

長沙

今長沙衡陽巴陵郡

武陵

今澧陽武陵黔中郡也

兵萬餘人乘船泝流

自沅水入武溪擊之

沅水出牂牁故且蘭東北經靈溪長沙巴陵郡入洞庭通江也武陵

溪在今盧溪郡靈溪縣

尚輕敵深入悉為所沒又遣伏波將軍馬

援將兵至臨沅

今武陵郡武陵縣即漢臨沅縣地

擊破之單程等飢困

乞降會援病卒謁者宗均為置吏以司之羣蠻遂平歷

章和安順四朝累反叛攻劫州郡討平之永和初武陵

太守上書以蠻夷卒服可比漢人增其租賦議者皆以

爲可尚書令虞詡獨奏曰自古聖王不臣異俗非德不能及威不能加其獸心貪婪難率以禮是故羈縻而綏撫之附則受而不逆叛則棄而不追先帝舊典貢稅多少所由來久矣今猥增之必有怨叛計其所得不償所費帝不從其冬澧中漚中蠻澧水出今澧陽郡縣澧音婁果爭布非舊約遂殺鄉吏舉種反自後至桓靈二帝又累反叛攻劫州郡討破之蜀先主章武初吳將李異屯巫梯歸今巴東郡先主遣將軍吳班攻破之於是武陵五溪蠻夷相率響應今黔中道謂之五溪其後種落布在諸郡縣居武陵者爲五溪蠻而宜都天門巴東建平江北諸郡蠻所居皆深

山重阻人跡罕至焉自晉劉石亂後諸蠻無所忌憚故

其族漸得北遷陸渾以南滿於山谷宛洛蕭條略爲邱

墟矣魏道武泰常八年蠻王梅安率渠帥數千朝京師

求留質子以表忠欵詔拜官褒慰之延興中太陽蠻首

桓誕誕元子元誅誕亡入蠻中蠻推爲主擁河水以北淫葉以南八萬餘

落遣使內附孝文嘉之拜誕征南將軍荊州刺史襄陽

王後降爲公其後蠻首田益宗雷婆思等俱率衆內屬

景明三年魯陽蠻伯鷲四年東荊州蠻樊素等反俱討

平之永寧初東京州表太守桓叔興前後招慰太陽蠻

歸附者一萬七百日請置郡十六縣五十詔從之叔興

誕子也三年梁遣兵討江沔破掠諸蠻遣兵擊走之其  
後累遣將圍廣陵楚城諸蠻並爲前驅自汝水以南蠻  
暴掠連年攻討散而復合其暴滋甚又有冉氏田氏向  
氏者陬落尤甚餘則大者萬家小者千戶更相崇僭稱  
王侯屯據三峽斷遏水路荆蜀行人至有假道者周文  
略定伊瀍聲教南被諸蠻畏服武成初文州蠻及冉令  
賢向五子等叛討平之隋置辰州以處蠻唐置錦州溪  
州巫州敘州皆其地也唐季蠻酋分據其地自署刺史  
晉天福中馬希範襲父業有湖南溪州刺史彭士愁等  
以溪錦蔣州歸馬氏立銅柱爲界宋建隆四年慕容延

釗平湖湘知溪州彭允林前溪州刺史田洪贊等列狀歸  
順詔仍其官父死則以其子繼之太平興國二年梅山  
洞蠻首領率衆寇劫商人詔遣使招諭猶寇暴不止乃  
發潭州兵擊平之八年溪錦敘巫四州蠻相率詣辰州  
願比內郡民輸租稅詔不許自後首領入貢不絕每加  
賞賜存恤之最大者曰彭氏彭氏世有溪州州有三曰  
上中下又有龍賜天賜忠順保靜感化永順州六懿安  
遠新給富來寧南順高州十一總二十州皆置刺史而  
以下溪州刺史兼都誓主十九州皆隸焉謂之誓下州  
誓下州將承襲都誓主率蠻酋合議子孫若弟姪親黨

人當立者具州名移辰州州爲保證申鈐轄司以聞迺  
賜勅告印符受命者隔江北望拜謝州有押案副使及  
校吏聽自補置彭氏自允殊文勇儒猛相繼爲下溪州  
刺史天禧中儒猛叛亡辰州發兵捕之執其子仕漢等  
歸京師儒猛降授仕漢殿直處之西京後輒遁歸天聖  
初以狀白辰州自言父老兄亡潛歸本道願放還家屬  
詔徙其家京師舍以官第未幾儒猛言仕漢逃歸引羣  
蠻爲亂遣別子仕端等殺人朝廷嘉其忠降詔獎諭自  
咸平以來始聽二十州納貢歲有賜蠻以爲利有罪則  
絕之熙寧初天子方用兵以威四夷湖北提刑趙鼎言

陝州洞酋刻剝無度蠻衆願內附屬辰州布衣張翹亦  
上書言南北江利害遂以章惇察訪湖北經制蠻事北  
江諸蠻隸辰州在黔之西南阻五溪漢黔中地爲羈縻  
州三十六而下溪州爲大彭氏世居之南江諸蠻自辰  
州達於長沙各有溪峒本唐郡縣五代失守諸酋分據  
其地曰敘曰峽曰中勝曰元則舒氏居之曰蔣曰錦曰  
懿曰晃則田氏居之曰富曰鶴曰保順曰天賜曰古則  
向氏居之惇旣經制於是南江之舒氏北江之彭氏梅  
山之蘇氏誠州之楊氏相繼納土創立城寨使之比內  
地爲王民置沅誠二州元祐初傅堯俞等言置二州以

來設官屯兵費巨萬計公私騷然荆湖兩路爲之空竭  
乃廢誠州爲渠陽軍而沅州至今爲郡時朝廷方務休  
息痛懲邀功生事者廣西張整融州溫嵩坐擅殺蠻人  
皆寘之罪詔諭湖南北及廣西路曰國家疆理四海務  
在柔遠頃荆湖諸蠻近漢者無所統一因其請吏量置  
城邑以撫治之邊臣邀功獻議創融州道路侵逼洞穴  
致生疑懼朝廷知其無用旋即廢罷邊吏失於撫遏遂  
爾扇搖其叛酋楊晟臺等並免追討諸路所開道路創  
置堡寨並廢自後五溪郡縣棄而不問崇寧以來開邊  
拓土之議復熾於是安化上三州及思廣洞蒙光明樂

安洞程大法都丹團黃光明靖州西道楊再立辰州覃  
都管罵等各願納土輸貢賦又令廣西招納左右江四  
百五十餘洞宣和中議者以爲招致熟蕃接武請吏竭  
金帛繒絮以啗其欲捐高爵厚俸以侈其心開辟荒蕪  
草創城邑張皇事勢僥倖賞恩入版圖者存虛名充府  
庫者亡實利不毛之地旣不可耕狼子野心頑又莫革  
建築之後西南夷獠交寇而溪洞之蠻亦復跳梁士卒  
死於干戈官吏沒於王事生民肝腦塗地往往有之以  
此知納土之議非徒亡益而又害之所由生也莫若俾  
帥臣監司條具建築以來財用出入之數商較利病可



省者省可併者併減戍兵省漕運而夷狄可撫邊鄙可無患矣乃詔悉廢所置州郡復祖宗之舊云崇寧初改誠州爲靖州紹興初監察御史明橐言溪洞歸明官應湖南邊郡及二廣皆有之自崇觀以來員數寢多當時務要優卹添差州郡指使及酒稅之類本不取其才任及諸州措置隘寨闕人把拓又令管押兵夫而所管押者皆鄉民也其歸明官生長溪峒初無愛民之意亦不習朝廷法令貪婪無厭鞭笞摧辱無所赴愬議者欲令帥臣措置適宜旣不致歸明官失所生怨亦無使遠民受害詔廣南荆湖路帥臣措置以聞隆興初右正言尹

穡言湖南州縣地界與溪峒蠻徭連接以故省民與徭人交結往來擅易田產其間豪猾大姓規免稅役多以產寄徭人戶下內虧國賦外滋邊隙省地與徭人相連舊有界至者宜詔湖南帥臣遣吏親詣其處明立封堠自今不許省民將田產典賣與徭人及私以產業寄隱若已前賣入徭戶難以遽行改追止令置籍如徭人願退還省地田產者縣以官錢代還之仍委曲榜諭從之嘉泰三年湖南安撫趙亮勵言湖南九郡皆與溪峒相接其地濶遠南接二廣北連湖右其人狼子野心不能長保其無事或因饑饉或因讐怨或因劫掠或至殺傷

州縣稍失隄防則不安巢穴越界生事爲今日計莫若先事選擇土豪爲徭人所信服者爲總首以任彈壓之責潛以馭之凡細微爭鬪止令總首彈壓開諭勸解自無浸淫之患蓋總首者語言嗜好皆與之同朝夕相接婚姻相通習知其利害審察其情僞而其力足以惠利之每遇饑歲則糴粟以賑其困乏徭人莫不感悅而聽從其言若先借補名目使得藉此以榮其身而見重於鄉曲彼必自愛惜而盡忠於公家如此則徭民之衆可坐以制之然亦須五年彈壓委有勞効然後正補以所借之官所捐者虛名所得者實利安邊之策莫急於此

詔令本路諸司相度條具諸司言趙亮勵所言謂以蠻徭治蠻徭其策莫良宜詔本路監司遵守從之嘉定初柳州黑風峒徭人羅世傳出掠省地飛虎統制邊寧戰沒遂爲江西湖南之擾明年知隆興府趙希懌知潭州史彌堅同共招降之二年李元礪羅孟二又率衆犯江西攻破龍泉縣知隆興府王居安擒獲之七年臣僚言夫熟戶山徭峒丁有田不許擅鬻頃畝多寡山畝濶狹各有界至任其耕種但以丁名繫籍每丁量納課米三斗悉無其他科配熟戶山徭峒丁樂其有田之可耕生界有警極力爲衛蓋欲保守田業也近年以來生界徭

獠其沒省地而州縣無以禁戢者皆繇不能遵守良法  
有以致之夫溪峒之專條山徭峒丁田地不許與省民  
交易蓋慮其窮困而無所顧籍不爲我用今州郡謾不  
加恩山徭峒丁有田者悉聽其與省民交易但利牙契  
所得而又省民得田輸稅在版籍常賦之外可以資郡  
帑泛用而山徭峒丁之米掛籍自如催督嚴峻多不聊  
生往往奔入生界溪峒受顧以贍口腹或爲鄉導或爲  
徒伴引惹生界出沒省地駸駸不已爲害甚大宜明敕  
湖廣監司行下諸郡凡屬溪峒山徭峒丁田業不得擅  
與省民交易犯者以違制論仍歸其田庶山徭峒丁有

田可耕不致妄生邊釁實綏靖遠民之良策從之

石湖范氏桂海虞衡志徭本盤瓠之後其地山溪高  
深介於巴蜀湖廣間綿亘數千里椎髻跣足衣斑斕  
布褐名爲徭而實不供征役各自以遠近爲伍以木  
葉覆屋種禾黍粟豆山芋雜以爲糧截竹筒而炊暇  
則獵食山獸以續食嶺蹬險阨負戴者悉着背上繩  
繫於額僂而趨俗喜讐殺猜忍輕死又能忍饑行鬪  
左腰長刀右負大弩手長鎗上下山險若飛兒始能  
行燒鐵石烙其跟蹠使頑木不仁故能履棘茨根枿  
而不傷兒始生秤之以鐵如其重漬之毒水兒長大

煨其鋼以製刀終身用之試刀必斬牛仰刃牛項下以肩負刀一負卽殊者良刀也弩名偏架弩隨跳躍中以一足蹶張背手傳矢往往命中鎗名掉鎗長二丈餘徒以護弩不恃以取勝戰則一弩一鎗相將而前執鎗者前却不常以衛弩執弩者口銜刀而手射人敵或冒刃逼之鎗無所施弩人釋弩取口中刀奮擊以救度險整其行列退去必有伏弩土軍弓手輩與之角技藝爭地利往往不能決勝也歲首祭盤瓠雜揉魚肉酒飯於木槽扣槽羣號爲禮十月朔日各以聚落祭都貝大王男女各成列連袂相攜而舞謂

之踏傜意相得則男咿嗚躍之女羣負所愛去遂爲夫婦不由父母其無配者俟來歲再會女三年無所向父母或欲殺之以其爲人所棄云樂有盧沙銃鼓胡盧笙竹笛之屬其合樂時衆音競鬩擊竹笛以爲節團欒跳躍叫咏以相之歲暮羣操樂入省地州縣扣人門乞錢米酒炙如儼然傜之屬桂林者興安靈川臨桂義寧古縣諸邑皆迫近山傜最强者曰羅曼傜麻園傜其餘如黃沙甲石嶺屯褒江贈脚黃村赤水藍思巾江竦江定花冷石白面黃意大利小平灘頭丹江閃江等傜不可勝數山谷間稻田無幾天少

雨稔種不收無所得食則四出犯省地求斗升以免  
死久乃玩狎雖豐歲猶剽掠沿邊省民與徭犬牙者  
風聲氣習及筋力技藝略相當或與通婚姻結怨仇  
往往爲徭鄉導而分鹵獲徭旣自識徑路遂數數侵  
軼邊民遂不能誰何攻害田廬剽穀粟牛畜無歲無  
之踉蹌篁竹飄忽往來州縣覺知則已趨入巢穴官  
軍不可入但分屯路口山多蹊不可以徧防加久成  
勞費又徭人常以山貨沙板滑石之屬竊與省民博  
鹽米山田易旱乾若一切閉截無所得食且冒死突  
出爲毒滋烈沿邊省民因與交關或侵負之與締仇

怨則又私出相讐殺余旣得其所以然乾道九年夏  
遣吏經理之悉罷官軍專用邊民籍其可用者七千  
餘人分爲五十團立之長副階級相制毋得與徭通  
爲之器械教習使可捍小寇不待報官徭犯一團諸  
團鳴鼓應之次告諭近徭亦視省民相團結毋得犯  
法則通其博易之路不然絕之彼見邊民已結形格  
勢禁不可輕犯幸得通博買有鹽米之利皆驩然聽  
命最後擇勇敢吏將桑江歸順五十二徭頭首深入  
生徑羅曼等洞尤狠戾素不賓化者亦以近徭利害  
諭之悉從乃爲置博易場二一在義寧一在融州之

榮溪天子誕節首領得赴屬縣與犒宴諸徭大悅伍籍遂定保鄣隱然萬一遠徭弗率必須先破近徭近徭欲動亦須先勝邊團始能越至城郭然亦難矣旣數月諸徭團長袁臺等數十人詣經略司謁謝悉紫袍巾裏橫挺犒以銀盃絲繩鹽酒勞遣之又各以誓狀來其略云某等旣充山職今當鈐束男姪男行持棒女行把麻任從出入不得生事者上有太陽下有地宿其翻背者生兒成驢生女成猪舉家滅絕不得翻面說好背面說惡不得偷寒送煖上山同路下水同船男兒帶刀同一邊一點一齊同殺盜賊不用此

欵者並依山例山例者誅殺也蠻語鄙陋不欲沒其實略志於此余承乏帥事二年諸徭無一跡及省地遂具以條約上聞詔許遵守行之

### 廩君種

廩君種不知何代初巴氏樊氏暉音審氏相氏鄭氏五姓

皆出於武落鍾離山在今夷陵郡巴山縣其上有赤黑二穴巴氏

之子生於赤穴四姓之子皆生黑穴未有君長共立巴

氏子務相是爲廩君從夷水下至鹽陽按今夷陵郡巴山縣清江水一

名夷水一名鹽水其源出清江縣西都亭山廩君於是君乎夷城四姓皆臣

之巴梁問諸巴皆是也卽巴漢之地按范曄後漢史云四姓之子未有君長俱事鬼神

乃共擲劍於石穴約能中者奉以為君務相乃獨中之  
又令各乘土船約能浮者當以為君餘姓悉沉惟務相  
獨浮因共立之是為廩君乃乘土船從夷水下鹽陽鹽  
水有神女謂廩君曰此地廣大魚鹽所出願留共居廩  
君不許鹽神暮輒來宿詰朝即化為蟲與諸蟲羣飛掩  
蔽日光天地晦冥積十餘日廩君伺其便因射殺之天  
乃開明廩君於是居於夷城四姓皆臣之廩君死魂魄  
化為白虎巴氏以虎飲人血故以人祠焉是皆怪誕以  
此不戰國時秦惠王并巴中以巴氏為蠻夷君長其人

取歲出賦二千一十六錢三歲一出義賦千八百錢其人

戶出傢布八丈二尺雞羽三十鏃說文曰傢布南軍蠻

毛詩四鏃既均儀禮鏃矢一乘鄭元曰鏃猶太守靳強奏請一依秦時故事至光武建武二十三年

南郡奏澗山蠻雷遷等始反叛屠音武威將軍劉尚討

破之徙其種人七千餘口置江夏界中其後沔中蠻是

也漢之江夏郡今竟陵富水安陸和帝永元十三年巫

蠻許聖等漢之巫縣今雲以郡收稅不均反叛發荊州

諸郡兵今江陵夷陵澧陽武陵討破之復悉徙置江夏

靈帝光和三年江夏蠻復反寇患累年廬江太守陸康

討破之漢廬江即漢末張魯居漢中以鬼道教百姓賓

人敬信巫覡多往奉之值天下大亂自巴西之宕渠遷

於漢中楊車坂抄掠行旅百姓患之號為車巴魏武克

漢中李特之祖將五百餘家歸之拜為將軍遷於略陽

北土號之為巴氏特父慕為東羌獵將特少仕州縣見

乾隆十二年校刊

四裔五

四

異當時雄武沉毅有大度元康中氏齊萬年反關中擾亂頻歲大饑百姓流移就食相與入漢川者數萬特隨流人入蜀聚巴西勇壯爲寇盜遂據梁益傳其弟流子雄僭卽帝位傳班期壽勢六世而亡

### 板楯蠻

板楯蠻秦昭襄王時有一白虎於蜀巴漢之境傷害千餘人昭王乃募有能殺虎者賞邑萬家時有巴郡閬中夷今閬中郡縣廖仲等射殺白虎昭王以其夷人不欲加封乃刻石盟要復夷人頃田不租十妻不算一戶免其一頃田之租稅雖有十妻不傷人者論殺人得以賧錢贖死何承天纂文曰賧蠻輸口算之錢

夷贖罪貨也賧徒濫反

盟曰秦犯夷輸黃龍二雙夷犯秦輸清酒

一鍾夷人安之至漢高帝爲漢王發夷人還三秦今關中秦

也秦地既定乃遣還巴中復其渠帥羅朴督鄂度夕龔

七姓不輸租賦餘戶乃歲入口錢四十巴人呼賦爲賓

謂之賓人焉代號爲板楯蠻夷閬中有渝水其人多居

水左右天性勁勇初爲漢前鋒數陷陣俗喜歌舞高帝

命樂人習之所謂巴渝舞也遂代代服從至後漢以後

郡守常率以征伐靈帝光和三年巴郡板楯蠻叛今通

山南平涪陵南川清化雲安始寧巴川南賓南浦寇掠

閬中南充安岳盛山等郡地則巴川之地是也  
三蜀及漢中諸郡卽漢川諸郡今漢中安康靈帝乃問



益州計吏考以征伐方略漢中計程苞對曰板楯七姓以射殺白虎立功先代復爲羌人其人勇猛善戰昔安帝永初中羌入漢川郡縣破壞得板楯救之羌死敗殆盡故號爲神兵至桓帝建和二年羌復大入實賴板楯連摧破之前車騎將軍馮緄南征武陵緄古本反亦倚板楯以成其功近益州郡縣亂今漢川蜀川郡縣地太守李顯之亦以板楯討而平之忠功如此本無惡心但長吏鄉亭更賦至重僕役筆楚過於奴虜闕庭悠遠不能自聞含怨呼天叩心窮谷故邑落相聚以致叛戾非有謀主僭號以圖不軌今但遣明能牧守自然安集不煩征伐也帝從

其言遣太守曹謙宣詔赦之卽皆降服及漢末天下亂

自巴西之宕渠

今符陽郡

遷於漢中楊車坂抄掠行旅號爲

楊車巴魏武克漢中李特之祖將五百家歸魏武又遷

於略陽北復號之爲巴氏

略陽今天水郡龍城縣

蜀後主劉禪建

興十一年涪陵屬國人夷反

今涪陵郡地

車騎將軍鄧芝往

討皆破平之其沔中蠻至晉時劉石亂後漸得北遷陸

渾以南滿於山谷宋時荊州置南蠻校尉

今江陵郡巴東夷陵雲安

等郡地

雍州置寧蠻校尉以領之

今襄陽南陽郡地

如蠻人順附

者一戶輸穀數斛其餘無事宋人賦役嚴苦貧者不復堪命多逃亡入蠻蠻無徭役强者又不供官稅結黨連

群動有數百千人州郡力弱則起為盜賊種類稍多戶

口不可知也文帝元嘉中天門今澧陽郡地澧中令宋矯之

徭賦過重蠻不堪命蠻田向求等為寇破澧中虜掠百

姓及劉道產善撫諸蠻前後不附官者莫不順服皆引

出平土多緣沔為居道產亡後蠻又反叛孝武帝出為

雍州時巴東今巴東郡建平今巴郡宜都今夷陵郡天門四郡蠻為

寇諸郡人戶流散百不存一孝武即位後大明中西陽

夷今弋陽郡皆反叛沈慶之率江雍荆河州諸軍討破之今江

潯陽郡陽章郡臨川廬陵等郡地明帝順帝時尤甚雖

遣攻討終不能禁荆州為之虛弊齊高帝時武陵西溪

蠻田思飄武帝永明初黔陽蠻田豆渠武陵黔陽皆今五溪中也湘

川蠻陳雙李答並寇掠州郡討平之湘川今長沙衡陽也其後雍

司州蠻今司州義陽弋陽郡與後魏通助荒人桓天生侵害齊境

六年除田駟路為試守北遂安左郡太守田驢王為試

守宜人左郡太守田何代為試守新平左郡太守皆郢

州蠻帥並漢沔間蠻也其左郡亦茲地焉郢州今江夏漢陽郡地後魏孝文太和中

襄陽蠻酋雷婆思率戶千餘內徙求居太和川詔給廩

食後開南陽全有沔北之地今武當南陽溪東等郡蠻人安堵不

為寇賊宣武帝景明初太陽蠻酋田育邱等共二萬八

千戶叛齊附魏詔置四郡十八縣魯陽蠻今臨汝郡魯

乾隆十二年校刊 四裔五

北鷲等聚眾萬餘攻逼潁陽詔遣左衛將軍李崇討平

之斬級數千徙萬餘家於河北諸州及六鎮尋叛南走

六鎮今單于府馬邑郡界也所在追討比及於河殺之皆盡梁武帝

遣兵沿沔破掠諸蠻又遣蔡令孫等三將步騎五千侵

南荆之西沿漢上下今襄陽郡之上武當郡以東地破略諸蠻後魏遣

蠻帥桓叔率蠻夏二萬餘人擊之斬令孫等俘虜二千

餘人其後因六鎮秦今天水隴今汧地所在反叛荆今

陽淮安郡地郢今汝南義陽郡蠻大擾動斷三鷗路今南陽郡向城縣北至臨汝郡

至於襄城今臨汝郡縣汝水處處鈔劫百姓多被其害自後

魏與宋齊梁之時淮汝江漢間諸蠻渠帥互有所屬皆

授封爵焉及魏末為暴滋甚有冉氏向氏田氏者陬落

尤甚大者萬家小者千戶更相崇樹僭稱王侯屯據三

峽斷遏水路荆蜀行人至有假道者西魏文帝大統十

一年沔漢諸蠻擾動大將軍楊忠擊破之其唐州蠻田

魯嘉示叛唐州今淮安郡自號荆河州伯遣王雄討之後周明

帝時蠻帥冉令賢向五子王等反攻陷白帝今雲安郡武帝

天和初詔開府陸騰討斬之蠻眾大潰斬首萬餘級騰

乃積其骸骨於水邏城側為京觀後蠻蠻見者輒大號

哭自此狼戾之心輟矣信州舊理白帝騰更於蜀先主

故城南八陣之北臨江岸築城移置信州又以巫縣信

陵秭歸

今雲安巴東二郡界

並是峽中要險於是築城置坊以為

襟帶焉

按後漢史其在黔中五溪長沙間則為盤瓠之後種落繁盛

後其在峽中巴梁間則為廩君之後種落繁盛

雜亦不可得詳別焉

通典言按後漢史其在黔中五溪長沙間者則為

盤瓠之種其在峽中巴梁間者則為廩君之後其

後種落繁盛侵擾州郡或移徙交錯不可得而詳

別今按通典所敘板楯蠻魏晉以後之事南史謂

之荆楊蠻北史謂之蠻獠而俱以為其源出自盤

瓠不言板楯然六朝時蠻漸徙而之北則亦無由

究其源流宗派矣姑兩存之

### 南平蠻

南平蠻東距智州南屬渝州西接南州北治州戶四千

餘多瘴癘山有毒草沙虱蝮蛇人樓居梯而上名為干

欄婦人橫布二幅穿中貫其首號曰通繆美髮髻垂於

後竹筒三寸斜穿其耳貴者飾以珠璫俗女多男少婦

人任役婚法女先以貨求男貧者無以嫁則賣為婢男

子左衽露髮徒跣其王姓朱氏號劔荔王唐貞觀三年

遣使內款以其地隸渝州又有甯氏世為南平渠帥陳

末以其帥猛力為寧越太守陳亡自以為與陳叔寶同

日而生當代為天子乃不入朝隋兵阻瘴不能進猛力

死子長真襲刺史及討林邑長真出兵攻其後又率部落從征遼東煬帝授官遣還又以其族人甯宣爲合浦太守隋亂皆以其地附蕭銑武德初以寧越鬱林之地降自是交愛諸州始通長真死子據襲刺史其地西南接烏蠻昆明哥蠻大小播州部族數十居之宋治平中熟夷李光吉梁秀等三族據其地各有衆數千家間以威勢誘脅漢戶有不從者屠之沒入土田往往投充客戶謂之納身稅賦皆里胥代償藏匿亡命數以其徒僞爲生獠劫邊民官軍追捕輒遯去習以爲常密賂黠民覘守令動靜稍築城堡繕器甲遠近患之熙寧三年轉

運使孫固判官張詵使兵馬使馮儀葉簡杜安行圖之以禍福開諭因進兵復賓化寨平蕩三族以其地賦民凡得租三萬五百石絲綿一萬六千兩以賓化寨爲隆化縣隸涪州建榮懿扶歡兩寨其外銅佛堪者隸渝州南州縣地皆膏腴自光吉等平他部族據有之朝廷因補其土人王才進充巡檢委之控扼才進死部族無所統數出盜邊朝廷命熊本討平之建堪爲南平軍以渝州南州涪州隆化隸焉元豐四年有楊光震者助官軍破乞弟殺其黨阿訛大觀二年木攀首領趙秦播州夷族楊光榮各以地內屬詔建溱播二州後皆廢

東謝

東謝渠帥姓謝氏南蠻別種在黔中之東地方千里其俗無文字刻木為約巢居刀劍不離其身冠熊皮被猛獸革酋長名元深代襲其一族不育女自云高姓不可下嫁唐貞觀三年元深入朝冠烏熊皮冠若今之旄頭以金絡額身披毛帔韋皮行滕而著履貞觀中開其地為應州隸黔州都督府

今黔中郡所管羈縻州

西趙

西趙蠻在東謝之南並南蠻別種其界東至夷子西至昆明南至西洱河山洞深阻莫知里數南北十八日行

東西二十三日行其風俗與東謝同趙氏代為酋長有萬餘戶自古不臣中國唐貞觀三年遣使入朝二十一年以其地置朝州以首領趙唐為刺史

牂柯

牂柯渠帥姓謝氏舊臣中國代為本土牧守隋末大亂遂絕唐貞觀中其酋遣使脩職貢勝兵戰士數萬於是列其地為牂柯

唐黔中郡羈縻州

昆明蠻一曰昆彌以西洱河

為境即葉榆河也距京師九千里土歌濕宜秔稻人辯首左衽與突厥同逐水草畜牧夏處高山冬入深谷尚戰死惡病亡勝兵數萬武德中雋州治中吉偉使南寧

因至其國諭使朝貢求內屬發兵戍守自是歲與牂牁使皆來龍朔三年矩州刺史謝法成招慰北樓等七千戶內附總章三年置祿火湯望州咸亨三年昆明十四姓率戶二萬內附析其地爲殷州總州敦州以安輯之殷州居戎州西北總州居西南敦州居南遠不過五百餘里近三百里其後又置盤麻等四十一州皆以首領爲刺史昆明九百里卽牂牁國也兵數出侵地數千里元和八年上表請盡歸牂牁故地開成元年鬼主阿珮內屬會昌中封其別帥爲羅殿王世襲爵其後又封別帥爲滇王皆牂牁蠻也東距辰州二千四百里其南千

五百里卽交州也無城郭土熱多霖雨稻粟再熟無徭役戰乃屯聚刻木爲契盜者倍三而償殺人者牛馬三十俗與東謝同首領亦姓謝氏

### 充州

充州牂牁別部與牂牁隣境勝兵二萬

唐黔中郡  
羈縻州

唐貞

觀中朝貢列其地爲充州開元中牂牁酋長元齊死孫嘉藝襲官封其後乃以趙氏爲酋長天寶中其裔趙珍裔有戰功閻羅鳳叛宰相楊國忠授珍裔黔中都督屢敗南詔護五溪十餘年天下方亂其部獨寧終工部尚書貞元元和以訖開成朝貢不絕

石湖范氏桂海虞衡志曰南方曰蠻亦曰西南蕃今郡縣之外羈縻州洞雖故皆蠻地猶近省民供稅役故不以蠻命之過羈縻則謂之化外真蠻矣區落連亘湖廣接於西戎種類殊詭不可勝計此等前世蓋嘗內附建黔南帥府於融州以統之今融帥已罷一切化外也融在徭洞之南蕃蠻之東蕃蠻時出州縣城郭以蜜臘草香等貿易每歲聖節亦有出赴燕設者其稱大小張大小王龍石騰謝等謂之西南蕃地與牂牁接人椎髻跣足或着木履衣青花斑布以射獵讐殺爲事持木牌標槍木弩藥箭相鈔掠而峩州

以西又有羅坐夜回計利流求萬壽多嶺阿悞等蠻謂之蠻酋酋自謂太保大抵與山獠相似但有首領耳其人椎髻以白紙繫之云尚與諸葛武侯制服也西南蕃俗大抵介別男夫甚剛妻女甚潔夫婦異居妻所居深藏不見人夫過其妻掛劔於門而後入或期於深山不褻穢其居謂否則鬼神禍之此諸蠻皆未嘗爲害故其事亦不能詳知又有漢蠻者十年前大理馬至橫山此蠻亦附以來衣服與中國略同能通華言自云本諸葛武侯戍兵聞其種人絕少按三國志初無留戍事唐史有西屠夷乃馬伏波兵留不



去者初止十戶隋末至三百戶皆姓馬號馬留人與  
林邑分唐境疑漢蠻卽此類其南連邕州南江之外  
稍有名稱者羅殿自杞以國名羅孔特磨白衣九道  
等以道名此皆成聚落地皆近南詔羅在融宜之西  
邕之西北唐會昌中封其帥爲羅殿王世襲爵歲以  
馬至橫山互市亦有移至邕稱守羅國王羅呂押馬  
者稱西南謝蕃知武州節度使都大照會羅殿國文  
字按唐史東謝蠻居黔州西謝氏世酋長部落尊畏  
之然則謝蕃蓋羅殿之巨室又知其地近牂牁自杞  
本小蠻尤兇狡嗜利其賣馬於橫山少拂意卽拔刃

向人亦嘗有所殺傷邕管亦殺數蠻以相當事乃已  
今其國王曰阿巳生三歲而立其臣阿謝柄國善撫  
其衆諸蠻比多附之至有精騎萬計阿巳年十七阿  
謝乃歸國政阿巳猶舉國以聽之諸蠻之至邕管賣  
馬者風聲氣習大抵略同其人多深目長身黑面白  
牙以錦纏椎髻短褐徒跣戴笠荷瑣珥刷牙金環約  
臂背長刀腰弩箭箠腋下佩皮篋胷至腰駢束麻索  
以便乘馬取馬於羣但持長繩走前擲馬首絡之一  
投必中刀長三尺甚利出自大理者尤奇性好潔數  
人共飯一柶中植一匕置杯水其傍少長共匕而食

探七於水抄飯一哺許搏之杵令圓淨始加之七上  
躍以入口蓋不欲汚七妨他人每飯極少飲酒亦止  
一杯數嚥始能盡蓋腰腹束於繩故也食鹽礬胡椒  
不食羶肉食已必刷齒故常皓然甚惡穢氣野次有  
穢必坎而覆之邕人每以此制其忿戾投以穢器輒  
躍馬驚走

### 獠

獠蓋蠻之別種往代初出自梁益之間自漢中達於邛  
笮川谷之間所在皆有北自漢中西南及越嶲俗不辯  
姓氏又無名字所生男女長幼次第呼之其丈夫稱阿

暮阿改婦人阿夷阿等之類皆其語之次第稱謂也依  
樹積木以居其上名曰干欄干欄大小隨其家之口數  
往往推一酋帥爲主亦不能遠相統攝父死則子繼若  
中國之黨族也獠王各有鼓角一雙使其子弟自吹擊  
之好殺害多仇怨不敢遠行性同禽獸至於忿怒父子  
不相避惟手有兵刃者先殺之若殺其父走避於外求  
得十狗以謝其母然後敢歸母得狗謝不復嫌恨若報  
怨相攻擊必殺而食之遞相劫掠不避親戚賣如猪狗  
而已亡失兒女一哭便止被賣者號哭不服逃竄避之  
乃將買人捕逐若亡叛獲便縛之但經被縛者卽服爲

賤隸不敢更稱良矣惟執楯持矛不識弓矢用竹爲簧  
羣聚鼓之以爲音節爲紉布色至鮮淨大狗一頭買一  
生口性尤畏鬼所殺之人美鬚髯者必剝其面皮籠之  
於竹及燥號之曰鬼鼓舞祀之以求福利俗尚淫祀至  
有賣其昆季妻孥盡者乃自賣以供祭焉鑄銅爲器大  
口寬腹名曰銅爨旣薄且輕易於熟食蜀本無獠晉李  
勢時諸獠始出巴西渠川廣漢陽安資中犍爲梓潼今  
內川之布在山谷十餘萬落攻破郡縣爲益州大患自桓  
温破蜀之後力不能制又蜀人東流山險之地多空獠  
遂挾山傍谷與人參居參居者頗輸租賦在深山者乃

爲匪人至梁武帝梁益二州

今漢川蜀川郡縣也

歲歲伐獠以自

裨潤公私頗藉爲利後魏宣武帝正始初將夏侯道遷

舉漢中附魏宣武帝遣尚書邢巒爲梁益二州刺史以

鎮之其後以梁益二州控攝嶮遠乃立巴州

在今清化郡

以

統諸獠後以巴酋帥嚴始欣爲刺史又立隆城鎮隆鎮

所綰獠二十萬戶所謂北獠也歲輸租布魏明帝孝昌

初據城叛入梁益二州並遣將討之攻陷巴州執始欣

斬之後梁州爲梁氏所陷

今漢中郡

自此又屬梁矣後周武

帝平梁

違奚武平之

益

尉遲迥

令所在撫慰其與華人雜居

者亦頗從賦役然天性暴亂旋致擾動每歲命隨近州

鎮出兵討之獲其生口以充賤隸謂之壓獠焉復有商旅往來者亦資以爲貨公卿逮於人庶之家有獠口者多矣其種類滋蔓保據巖壑依林走險若履平地性又無知殆同禽獸諸夷之中最難以道義招懷也劔南諸獠唐武德貞觀間數寇州縣者不一巴州山獠王爲馨叛梁州都督龐玉梟其首又破餘黨符陽白石二縣獠其後眉州獠反益州行臺郭行方大破之未幾又破洪雅二州獠俘男女五千口是歲益州獠亦反都督竇軌請擊之太宗報曰獠依山險當拊以恩信脅人以兵威豈爲人父母意邪貞觀七年東西玉洞獠反以右屯衛

大將軍張士貴爲龔州道行軍總管討平之十二年巫州獠叛夔州都督齊善行擊破之俘男女三千餘口鈞州獠叛桂州都督張寶德討平之明州山獠又叛交州都督李道彥擊走之是歲巴洋集壁四州山獠叛攻巴州遣右武侯將軍上官懷仁破之於壁州虜男女萬餘明年遂平十四年羅竇諸獠叛以廣州都督黨仁弘爲竇州道行軍總管擊之虜男女七千餘人太宗再伐高麗爲船劔南諸獠皆半役雅邛眉三州獠不堪其擾相率叛詔發隴右峽兵二萬以茂州都督張士貴爲雅州道行軍總管與右衛將軍梁建方平之高宗初琰州獠

叛梓州都督謝萬歲兗州刺史謝法興黔州都督李孟嘗討之萬歲法興入洞招慰遇害顯慶二年羅竇生獠酋領多胡桑率衆內附上元末納州獠叛寇故茂都掌二縣殺吏民焚解舍詔黔州都督發兵擊之大歷二年桂州山獠叛陷州刺史李良遁去貞元中加州綏山縣婆籠川生獠酋領甫枳兄弟誘生蠻爲亂剽居人西川節度使韋臯斬獠招其酋領勇于等出降或請增柵東陵界以守軍不從曰無戎而城害所生也獠亦自是不擾境戎瀘間有葛獠居依山谷林箐踰數百里俗喜叛州縣撫視不至必合黨數千人持排而戰奉酋帥爲王

號曰婆能出入前後植旗大中末昌瀘二州刺史貪沓以弱繒及羊彊獠市米麥一斛得直不及半羣獠訴曰當爲賊取死耳刺史召二吏榜之曰皆爾屬爲之非吾過獠相視大笑遂叛立酋長始艾爲王踰梓潼所過焚剽刺史劉成師誘降其黨斬酋領七十餘人餘衆遁至東川節度使柳仲郢諭降之始艾稽首謝罪仲郢貰遣之

石湖范氏桂海虞衡志曰獠依山林而居無酋長版籍蠻之荒忽無常者也以射生食動爲活蟲豸能蠕動者皆取食無年甲姓名一村中推有事力者曰郎

火餘但稱火歲首以土杯十二貯水隨辰位布列郎  
火禱焉乃集衆往觀若寅有水而卯涸則知正月雨  
二月旱自以不差諸蕃歲賣馬於官道其境必要取  
貨及鹽牛否則梗馬路官亦以鹽綵和謝之其稍稍  
漸有名稱曰上下者則入蠻類舊傳獠有飛頭鑿齒  
鼻飲白衫花面赤視之屬二十一種今右江西南一  
帶甚多殆百餘種唐房千里異物志言獠婦生子卽  
出夫憊卧如乳婦不謹則病其妻乃無苦唐志言飛  
頭獠者頭欲飛周項有痕如縷妻子共守之及夜如  
病頭忽亡比旦還又有烏武獠地多瘴毒中者不能

飲藥故自鑿齒

文獻通考卷第三百二十八

文獻通考卷第三百二十九

鄱 陽 馬 端 臨 貴 與 著

四裔考六

夜郎國

夜郎國

今夜郎播川犍為郡即其國

漢時西南夷君長以十數夜郎

最大在蜀郡徼外東接交趾西鄰滇國

今雲南郡滇國

其國鄰

牂牁江江廣數里出番禺城下

戰國時楚頃襄王遣將莊蹻從沅水伐夜郎軍

至且蘭楛船於岸而步戰既滅夜郎因留王滇池以且蘭有楛船牂牁處乃改其名為牂牁牂牁繫船也番

禺即今南海郡城南江杙音弋

其地多雨潦俗好巫禁忌寡畜產又無

蠶桑故最貧鈎町有桄榔木可以為麵百姓資之

鈎町漢以

為縣屬牂牁郡鈞音武帝時唐蒙上書曰竊聞夜郎精

兵可得十餘萬浮船牂牁江出不意此制南越奇兵也

乃拜蒙為郎中遂見夜郎侯蒙厚賜諭以威德夜郎貪

漢繒帛以為漢道險終不能有也乃與蒙約還報乃以

為犍為郡今犍為陽安仁壽通發巴巴郡今通川等十

蜀卒蜀郡今蜀郡濛陽唐安臨理道自犍道指牂牁江

蜀人司馬相如亦言西夷邛笮可置郡今越嶲帝使相

如往諭皆如南夷為置一郡尉十餘縣屬蜀郡當是時

巴蜀四郡漢中廣漢巴郡今漢通西南夷道成轉相饒

古餉數歲道不通士罷餓離濕罷音疲死者甚眾夷又

字

數反發兵興擊耗費無功帝患之使公孫弘往視問焉

還言其不便時方築朔方據河逐胡弘因數言西南夷

為害通西南夷可且罷專力事匈奴上罷西夷獨置南

夷兩縣一都尉及元狩元年張騫言使大夏時見蜀布

邛竹杖問所從來曰從東南身毒國即天竺也可數千里得

蜀賈人市或聞邛西可二千里有身毒國於是乃令王

然于閒出西南夷往身毒國至滇道皆為昆明所閉昆明

在今越嶲莫能通身毒及南越反上使發南夷兵且蘭

君小邑乃與其眾反漢發巴蜀校尉擊破之遂平南夷

為牂牁郡今涪川夜郎夜郎侯始倚南越越滅恐懼遂

乾隆十二年校刊



入朝封為夜郎王昭帝始元中牂牁談指同並等二十  
四邑凡三萬餘人皆反並音伴談指同並後皆為縣屬漢牂牁郡遣水衡都

尉發蜀郡犍為兵擊牂牁大破之後姑繒葉榆人復反

鈞町侯亡波率其人擊之有功漢立亡波為鈞町王至

成帝河平中夜郎王興與鈞町王禹漏臥侯俞漏臥夷邑名後

為縣屬漢牂牁更舉兵相攻牂牁太守請發兵誅興等漢以道

遠不可擊遣大中大夫張匡持節和解並不從杜欽說

王鳳曰張匡和解蠻夷王侯王侯不從不憚國威其效

可見恐議者選更復守和解選更怯懦不前之意太守

察動靜有變廼以聞如此則復曠一時曠空也一時三

不早發兵王侯得收獵其眾申固其謀黨助眾多各不勝忿

必相殄滅自知罪成狂犯守尉言起狂悖之遠藏温暑

毒草之地雖有孫吳之將賁育之士若入水火往必焦

沒智勇俱亡所設施屯田備守之費不可勝量宜因其

罪惡未成未疑國家加誅陰勅旁郡守尉練士馬大司

農先調穀積要害處調發也要害者在選任職太守往

以秋涼時入誅其王侯尤不軌者即以為不毛之地亡

用之人聖王不以勞中國即猶若也不毛宜罷郡放棄

其人絕其王侯勿復通如以先帝所立累代之功不可

隳壞亦宜因其萌芽早斷絕之反已成形然後師興則

萬姓被害矣鳳於是薦陳立為牂牁太守至牂牁迺從吏數十人出行縣召典與將數千人往立數責因斷典頭出曉其眾皆釋兵降興子邪務收餘兵迫脅旁二邑反立又擊平之公孫述時大姓龍傳尹董氏與郡功曹謝暹保境為漢乃遣使從番禺江奉貢番禺江今南海郡光武嘉之並加褒賞桓帝時郡人尹政乃從汝南許慎應奉受經書學成還鄉里教授自是南域始有學焉政官至荊州刺史後漢史云有女子浣於遯水有三節大竹流入足間剖之得一男兒養之及長自立為夜郎侯以竹為姓武帝元鼎中置牂牁郡夜郎侯迎降天子賜其王印綬後遂殺之夷獠咸以竹王非血氣所生甚重之求為立後牂牁太守吳霸以聞天子乃封其三子為侯死配食其父按范曄所選乃引華陽國志

又案漢書其夜郎侯降封王不言殺成帝時猶謂之夜郎王曄焉得云竹王被殺後封其子為侯與班史全乖角宜華陽國志為怪詭也大抵范曄著述多稱詭異若無他書可以辯正則因習纂錄不復刊革云

唐置費珍莊琰播郎牂夷等州其地北距充州百五十里東距辰州二千四百里南距交州一千五百里西距昆明九百里無城郭散居村落土多霖雨稻粟皆再熟無徭役將征戰乃屯聚刻木為契其法劫盜者償其主三倍殺人者出牛馬三十頭與其家以贖死疾病無醫藥但擊銅砂羅以祀神風俗與東謝蠻同隋大業末首領謝龍羽據其地勝兵數萬人唐末王建據西川由是不通中國後唐天成二年牂牁清州刺史宋朝化等一

百五十人來朝孟知祥據蜀復不通朝貢宋乾德三年平蜀五年知西南蕃南寧州蕃落使龍亮瑄等來貢詔授以官開寶二年武才等一百四十人來貢八年二十九部順化王子若廢等三百七十人來貢馬百六十匹丹砂千兩太平興國五年蕃王龍瓊瑀遣其子并諸州蠻七百四十七人以方物名馬來貢自是至景德朝貢不絕太宗召見其使詢以地理風俗譯對曰地去宜州陸行四十五日土宜五穀多種秔稻以木弩射麋鹿充食每三二百戶爲一州州有長殺人者不償死出家以贖國王居有城郭無壁壘官府惟短垣光進說與前書

所記小異故并敘之上因令作本國歌舞一人吹瓢笙如蚊蚋聲良久數十輩連袂宛轉而舞以足頓地爲節詢其曲則名曰水曲其使十數輩從者千餘人皆蓬髮面目黧黑狀如猿狖使者衣虎皮氊裘以虎尾插首爲飾大中祥符以後頗爲寇抄轉運使寇瑊調兵擊之夷人寧息天聖以來訖於元符貢奉其首領龍氏於諸姓爲最大世世襲職貢奉尤頻使者但衣布袍至假伶人之衣入見蓋實貧陋所冀者恩賞而已賜以袍帶等物至刺其數於臂故事蠻夷入貢雖交趾于闐之屬皆御前殿見之獨此諸蕃見於後殿蓋卑之也諸蕃部族數

十獨龍方張石羅五姓最著號五姓蠻其後又有程氏  
韋氏皆比附五姓故號西南七番云

滇者漢時在夜郎之西靡莫之屬滇最大靡莫西南徼外蠻也滇音

顛始楚頃襄王使將軍莊躡躡即莊王之苗裔居畧反將兵循江上

畧巴黔以西巴國今清化始寧咸安符陽巴川南賓南浦是其地也黔則黔中躡至滇

池方三百里在今雲南郡其澤在西北水源深廣未更淺狹如倒流故曰滇池旁平地

肥饒數千里池旁之地以兵威定屬楚欲歸報會秦擊楚巴

黔中郡道塞不通因而以其眾王滇變服從其俗以長

之為其長帥也案史記及漢書皆云楚威王使莊躡畧巴黔以西至滇池欲歸會秦奪楚巴黔中郡因以其

眾王滇後十餘歲秦滅之又案楚自威王後懷王立三  
十年至頃襄王之二十二年秦昭襄王遣兵攻楚取巫

黔中郡地後漢史則云頃襄王時莊豪王滇豪即躡也  
若莊躡自威王時將兵畧地屬秦陷巫黔中郡道塞不

還凡經五十二年豈得如此淹久或恐史記謬誤班生  
曰習便書范曄所記詳考為正又案莊躡王滇後十五

年頃襄王卒考烈王立二十五年幽王立十年王負芻  
立五年而楚滅十五年而秦亡七十年何故云躡之王

滇後十餘歲而秦至武帝時滇王有眾數萬人元封二  
亡斯又未之詳也

年發巴蜀兵臨滇滇王舉國降請置吏入朝於是以為

益州郡今雲南郡賜滇王王印長復其人武帝割牂牁越雋各數縣配之後數

年復并昆明西南夷君長以百數獨夜郎滇受王印滇  
地皆以屬之

小邑也最寵焉後王莽篡位改漢制貶鈞町王為侯蠻  
夷盡反莽遣平蠻將軍馮茂發巴蜀犍為吏士賦取足

於人以擊益州出入三年疾疫死者什七巴蜀騷動更遣寧始將軍廉丹大發天水隴西騎士廣漢蜀犍為吏人十萬轉輸者合二十萬人擊之不能尅而還公孫述據益土文齊為太守亦固守拒述後漢初遣使朝謁建武十八年夷渠帥棟蠶與姑復葉榆楛棟連然滇池建伶昆明諸種反叛殺長吏漢姑復縣屬越嵩郡餘六縣並屬益州郡也並在今越嵩雲南郡地遣武威將軍劉尙等發廣漢犍為蜀人及朱提夷擊之尙軍遂渡瀘水入益州郡界瀘水一名若水旄牛入江在今越嵩郡南時有瘴氣羣夷聞大兵至皆棄壘奔走尙獲其羸弱穀畜斬棟蠶帥凡首虜萬餘人諸夷悉平至蜀後主

建興二年諸葛孔明率眾南征四郡平之改益州郡為

建寧分建寧永昌今雲南郡也為雲南郡又分建寧牂牁為

興古郡亮至南中所戰皆捷孟獲者為夷漢所服募生日不知虛實故敗定易勝耳亮縱使更戰七縱七擒而亮猶遣獲獲止去曰公天威也南人不復反矣遂至滇池南中平皆即其渠率而用之或以諫亮亮曰若留外人即留兵兵留即無食一不易也夷新傷破父兄死喪留外人而無兵者必成禍患二不易也又吏累有廢殺之罪自嫌釁重若留外人終不相信三不易也今欲使汝不留兵不運糧而綱紀遂定夷漢相安故爾

邛都邛都漢時自滇以北君長十數邛都最大今越嵩郡本其地自

夜郎滇邛都人皆椎髻左衽邑聚而居知耕田其外西

日桐師以東北至葉榆

葉榆澤名名為雋昆明

雋即今越雋郡昆明在西

南諸爨所居

地方數千里無君長辮髮隨畜遷徙無常武帝

開以為邛都縣屬越雋郡無幾而地陷為汙澤因名為

邛池南人以為邛河其人後復反叛元鼎六年漢兵自

越雋水伐平之

雋水源出今越雋郡西南雋山下

其土地平原有稻田

俗多遊蕩而喜謳歌畧與犍犸相類豪帥放縱難得制

御王莽時郡守牧根

牧根太守姓名

調邛人長貴以為軍侯更

始三年長貴攻殺牧根自立為邛穀王至光武因就封

之授越雋太守印綬後劉尚擊益州夷路由越雋長貴

聞之即聚兵欲襲尚尚掩長貴誅之徙其家屬於成都

安帝時永昌益州蜀郡夷

並今雲南郡

皆叛眾十餘萬破壞

二十餘縣益州刺史張喬乃遣從事楊竦將兵至葉榆

破之渠帥三十六種皆來降附竦因奏長吏姦猾侵犯

蠻夷者九十人皆減死論

### 筰都

筰都者漢時自越雋以東北君長以十數徙

徙漢為縣屬蜀郡

筰都最大武帝開以為筰都縣其人被髮左衽言語多

好譬類居處畧與汶山夷同

汶山夷在蜀郡西北即冉駝也今通化郡

元鼎

六年以為冗黎郡

今洪源郡

至天漢四年并蜀為西部置兩

部尉一居旄牛主徼外夷一居青衣主漢人

旄牛青衣並今蜀郡

之後漢明帝永平中益州刺史朱輔慷慨有大畧宣示  
 漢德威懷遠夷自汶山以西前代不至正朔所不加狼  
 槃木唐菽等菽阻留反百有餘國戶百三十餘萬舉種奉貢  
 稱為臣僕和帝永光十二年旄牛徼外白狼樓薄蠻夷  
 王唐繒等遂率種十七萬戶口內屬安帝永和元年蜀  
 郡三襄種夷與徼外汗許種反叛攻蠶陸城翼郡地在蜀郡之西  
 汗音烏許呼五反殺長吏二年青衣道夷邑長令田令姓田名也與  
 徼外三種夷三十一萬口舉土內屬後旄牛夷叛攻零  
 關零關道屬漢越雋即今郡益州刺史張喬與西部尉擊破之於是  
 分置蜀郡屬國都尉領縣四如太守

冉駝

冉駝漢時自笮以北君長十數冉駝最大其俗土著或  
 隨畜遷徙在蜀西武帝元鼎六年以為汶山郡今蜀郡西北通  
 地化郡至宣帝地節三年夷人以立郡賦重帝乃省并蜀  
 郡為北部都尉其山有六夷七羌九氏各有部落其王  
 侯頗知文書土氣多寒雖在盛夏冰猶不釋皆依山居  
 止累石為室高者至十餘丈為邛籠今彼土夷人呼為彫又土地  
 剛鹵不生穀粟麻菽唯以麥為資而宜畜牧有旄牛無  
 角一名犛牛肉重千斤毛可為毼犛徒冬反毼音冑出名馬有  
 羴羊可療毒又有食藥鹿鹿麕有有胎者其腸中有糞

亦療毒疾又有五角羊其西又有三河槃于虜北有黃石地北盧水胡其表乃爲徼外後漢靈帝時復分蜀郡北部爲汶山郡蜀後主建興十年汶山平康夷反姜維討破之

附國

附國隋代通焉在蜀郡西北二千餘里卽漢之西夷也有嘉良夷卽其東部所居種自相率領不能統一土俗與附國同言語少殊其人並無姓氏其地南北八百里東西四千五百里無城柵近川谷傍山險俗好復讐故疊石爲礮而居以避其患其礮與巢字同高至十餘丈下至

五六丈狀似浮圖於下級開小門從內上通夜必關閉有二萬餘家弓長六尺以竹爲弦妻其羣母及嫂兄弟死父兄亦納其妻好歌舞鼓簧吹長笛有死者無服制置屍於高床上沐浴衣服以牟甲覆以獸皮子孫不哭帶甲舞劔而呼云我父爲鬼所取我欲報寃殺鬼其俗以皮爲帽形圓如鉢或戴冪離衣多毛毼裘毼胡割反全剝牛脚皮爲靴項繫鐵釧王與酋帥金飾首胸前懸一金花徑三寸其土高氣候涼多風少雨宜小麥青斜山出金銀多白雉水有嘉魚長四尺鱗細煬帝大業四年其王遣子弟宜林率嘉良夷六十人朝貢嘉良有水闊六



七十丈附國水闊百餘丈並南流用皮爲舟而濟附國南有薄緣夷風俗亦同西有女國其東北連山綿亘數千里接黨項及諸羌

按其地接汶山故爲附焉

### 哀牢

哀牢後漢時通焉其先有婦人名沙壹居於牢山嘗捕魚水中觸沉木若有感因懷妊十月產男子後沉木化爲龍出水因舐其男之背其母鳥語謂背爲九謂坐爲隆因名曰九隆後漸相滋長種人皆刻畫其身象龍文衣背著尾九隆代代相繼乃分置小王往往邑居散在溪谷絕域荒外山川阻深生人以來未嘗交通中國光

武建武中其王賢栗等遂率衆人戶二千七百詣越

太守鄭鴻降求內屬帝封賢栗等爲君長自是歲來朝

貢明帝永平中哀牢王柳貌遣子率種人內屬其稱邑

王者七十人戶五萬一千八百九十四界去洛陽七千

里明帝以其地置哀牢博南二縣

今雲南越雋之西

割益州郡

西部都尉所領六縣

後漢六縣謂不韋雋唐北蘇葉榆邪龍雲南並今雲南越雋之西

合爲永昌郡

即今雲南郡

始通博南山渡蘭倉水

華陽國志曰博南縣

西山高三十里越之得蘭倉水行者苦之歌曰漢德廣開不賓度博南

越蘭津渡蘭倉爲他人哀牢人皆穿鼻僮耳

僮丁其渠甘反

帥自謂王者耳皆下肩三寸庶人則至肩而已土地沃

美宜五穀蠶桑染綵文繡蘭干細布

華陽國志曰蘭干獠言紵也

成文章綾錦有梧桐木華績以為布

廣志曰梧桐有白者剽國有桐木其

華有白毳取毳淹績緝以為布

幅廣五尺潔白不受垢汗先以覆亡人

然後服之其竹節相去二丈名曰濮竹出銅鐵鉛錫金

銀光珠

博物志曰光珠即江珠

琥珀水精瑠璃軻蟲蚌珠孔雀翡

翠犀象猩猩貊獸

山海經云猩猩知人名據華陽國志曰永昌郡有猩猩能言取其血可以

染朱罽荀卿子曰猩猩能言笑淮南萬畢術曰婦終知來猩猩知往註云並神獸也後魏酈元注水經云武平

郡封溪縣有獸名猩猩猿形人面身毛黃姿顏端正善學人語聞者無不酸楚太原王綱著傳云阮研曾使封

溪見邑人說猩猩好酒及履里人置之山谷嘗行路百數為羣見酒物等知人設張取之此獸甚靈先知其人

祖父姓名而罵曰奴欲殺我捨爾去也既去復還因相呼曰試共嘗酒及飲乃甘其味逮乎醉偕擒之無遺逸

遂置檻中隨其所欲飼之將烹索其肥者乃自推擇泣

而遣之又禮記曰猩猩能言廣志云猩猩唯聞其啼不

聞其言出交趾郡封溪縣按前代永昌郡即今雲南郡

武平郡即今安南郡並封畧之內古謂其靈而智不因

人教而解人語殊為珍異秦漢以降天下一家即嶺南

獻能言鳥及馴象西域獻汗血馬皆載之史傳以為奇

物復廣異聞聲教遠覃如越裳白雉之類故彰示後代

則猩猩不劣於鳥象何為獨無獻乎獲之以充口實則

致之固難也王莽置漢孺子於西壁中禁人與語及長

又不能名六畜猩猩若非靈異自解人語即須因教方成

又不可容易而為庖膳也是知諸家所說不加考覈遞

相祖述耳佑以為廣志尤足徵矣血染朱罽徧問胡商

元無此事故

永昌太守鄭純為政清潔化行夷人與哀

牢夷人約邑豪歲輸布貫頭衣二領鹽一斛為常賦夷

俗安之唐麟德元年五月於昆明之楸棟川置姚州都

督府每年差兵募五百人鎮守武太后神功二年閏十

月蜀州刺史張柬之上表曰姚州者古哀牢之舊國本  
不與中國交通前漢唐蒙開夜郎滇笮而哀牢不附至  
光武季年始請內屬漢置永昌郡以統理之稅其鹽布  
氈罽以利中土其國西通大秦南通交趾奇珍進貢歲  
時不闕及諸葛亮五月度瀘收其金銀鹽布以益軍儲  
使張伯岐選其勁卒以增武備前代置郡其利頗深今  
鹽布之稅不供珍奇之貢不入而空竭府庫驅率平人  
受役夷蠻肝腦塗地漢以得利既多歷博南山涉蘭倉  
水更置博南哀牢二縣蜀人愁怨行者作歌蓋漢得其  
利人且怨歌今於國家無絲髮之利在百姓受終身之

酷往者諸葛亮破南中使其渠帥自相統領不置漢官  
亦不留鎮守臣竊以亮之策妙得羈縻蠻夷之術今姚  
府置官既無安邊靜寇之心又無葛亮且縱且擒之術  
唯知詭謀狡算恣情割剝貪婪劫掠積以爲常扇動酋  
渠遂成朋黨提挈子弟嘯引凶愚今見散亡彼州專以  
掠奪爲業姚州本武陵縣主簿石子仁奏置之後長史  
李孝讓辛文協並爲羣蠻所殺又使將軍李義總往征  
郎將劉惠在戰陣死其州遂廢卽諸葛亮稱置官留兵  
有三不易之言遂驗垂拱四年南蠻郎將王善寶昆州  
刺史爨乾福又請置州奏言所有課稅自出姚府管內

更不勞擾蜀川及置州後錄事參軍李稜爲蠻所殺延載年中司馬成琛請於瀘南置鎮七所遣蜀兵防守自此蜀中騷擾於今不息伏乞省罷姚州使隸雋府歲時朝覲同之蕃國瀘南諸國悉廢於瀘北置關百姓非奉使入蕃不許交通往來疏奏不納

### 南詔

南詔或曰鶴柘曰龍尾曰苴咩曰陽劔本哀牢夷後烏蠻別種夷語王爲詔其先渠帥有六詔號六詔曰蒙雋詔越析詔浪穹詔遼睽詔施浪詔蒙舍詔兵埒不能相君長蜀諸葛亮討定之蒙舍詔在諸部南故曰南詔居

永昌姚州之間鐵橋之南東距巽東南屬交趾西摩伽佗西北與吐蕃接南女王西南驃北抵益州東北際黔巫王都羊苴咩城別都曰善闡府王自稱曰元猶朕也謂其下曰昶猶卿爾也官之大者曰清平官以決國事猶唐宰相也爽猶省也督爽總三省也百家有總俗千家有治人官萬家有都督一凡田五畝曰雙上官授田四十雙上戶三十雙以是爲差壯者爲戰卒有馬爲騎軍一將統千人四軍置一將其外有六節度二都督十驗夷語驗若州云初羣山之西多瘴歊地平草不枯自曲靖州至滇池人水耕食蠶以柘蠶生閱二旬而蠶大

和祈鮮而西人不蠶剖波羅樹實狀若絮紐縷而幅之  
有井產鹽有野桑生石上其材可爲弓不筋漆而利長  
川諸山有金越睽之西多薦草產善馬婦人不粉黛以  
蘇澤髮俗以寅爲正四時大抵與中國少差師行以二  
千五百人爲一營其法前傷者養治後傷者斬犁田一  
牛三夫前挽中壓後驅然專於農無貴賤皆耕不繇役  
歲輸米二斗一藝者給田二收乃稅王蒙氏父子以名  
相屬自舍龍以來有譜次可考舍龍生細奴邏唐高宗  
時遣使者入朝賜錦袍其孫炎閣武后時入朝炎閣立  
死開元時弟盛邏皮立生皮邏閣授特進封臺登郡王

炎閣未有子時以閣羅鳳爲嗣及生子還其宗而名成  
閣遂不改開元末皮邏閣逐河蠻取大和城又襲大釐  
城守之因城龍口夷語山陂陀爲和故謂大和以處閣  
羅鳳天子詔賜皮邏閣名歸義當是時五詔徵歸義獨  
彊乃厚以利啖劍南節度使王昱求合六詔爲一制可  
歸義已并羣蠻遂破吐蕃寢驕大入朝天子亦爲加禮  
又以破泐蠻功馳遣中人冊爲雲南王賜錦袍金鈿帶  
七事於是徙治大和城天寶初遣閣羅鳳子鳳迦異入  
宿衛拜鴻臚卿恩賜七載歸義死閣羅鳳立襲王以其  
子鳳迦異爲瓜州刺史初安寧城有五鹽井人得煮鬻

自給元宗詔特進何履光以兵定南詔境取安寧城及  
井復立馬援銅柱乃還鮮于仲通領劍南節度使下忿  
少方畧故事南詔嘗與妻子謁都督過雲南太守張虔  
陀私之多所求丐閻羅鳳不應虔陀數詬斬之陰表其  
罪由是忿怨反發兵攻虔陀殺之取姚州及小夷州凡  
三十二明年仲通自將出戎嶺州分二道進次曲州靖  
州閻羅鳳遣使者謝罪願還所攜得自新旦城姚州如  
不聽則歸命吐蕃恐雲南非唐有仲通怒囚使者進薄  
白崖城大敗引還閻羅鳳斂戰齒築京觀遂北臣吐蕃  
吐蕃語謂弟爲鍾稱贊普鍾給金印號東帝揭碑國門

明不得已叛曰我上世世奉中國累封賞後嗣容歸之  
若唐使至可指碑澡祓吾罪也會楊國忠以劍南節度  
當國乃調天下兵凡十萬使侍御史李宓討之輦餉者  
尚不在涉海而疫死相踵於道宓敗於太和城死者十  
八亦會安祿山反閻羅鳳因之取嶺州會同軍據清溪  
關以破越析梟於贈西而降尋傳驃諸國尋傳蠻者俗  
無絲纊跣履榛棘不苦也射猪生食其肉戰以竹籠頭  
如兜鍪其西有裸蠻亦曰野蠻漫散山中無君長作檻  
舍居男少女多無田農以木皮蔽形婦或十或五共養  
一男子廣德初鳳迦異築柘東城諸葛亮石刻故文曰

碑卽仆蠻爲漢奴夷畏誓常以石楛梧大歷十四年閏  
羅鳳以鳳迦異前死立其孫異牟尋以嗣異牟尋有智  
數善撫衆略知書母李獨錦蠻女也獨錦蠻亦爲烏蠻  
種秦藏川南天寶中命其長爲蹄州刺史世與南詔婚  
聘異牟尋立悉衆二十萬入寇與吐蕃并力一趨茂州  
踰文川擾灌口一趨扶文掠方維白坭一侵黎雅叩叩  
邾關令其下曰爲我取蜀爲東府工伎悉送邏娑城歲  
賦一縑於是進陷城聚人率走山德宗發禁衛及幽州  
軍以援東川與山東兵合大敗異牟尋衆斬首六千級  
擒生捕傷甚衆顛踣厓峭且十萬異牟尋懼徙苴咩城

築表十五里吐蕃封爲日東王然吐蕃責賦數悉奪其  
險立營候歲索兵助防異牟尋稍苦之唐人鄭回爲清  
平官說異牟尋曰中國有禮義少求責非若吐蕃徇刻  
無極也今棄之復歸唐無遠戍勞利莫大於此異牟尋  
善之會節度使韋臯撫諸蠻有威惠諸蠻頗得異牟尋  
語白臯貞元九年乃遣使者趣成都遺臯書願竭誠自  
新歸欵天子請加戍劍南西山涇原等州安西鎮守揚  
兵四臨委回鶻諸國所在侵掠使吐蕃勢分力散不能  
爲邊患德宗嘉之賜以詔書異牟尋乃殺吐蕃使迎唐  
使遣其臣隨使入朝初吐蕃與回鶻戰殺傷甚乃調南

詔萬人異牟尋欲襲吐蕃陽示寡弱以三千人行卽自將數萬踵後晝夜行大破吐蕃於神川遂斷鐵橋溺死以萬計俘其五王乃遣使入獻地圖方物請復號南詔帝賜賚有加遣使冊異牟尋爲南詔王異牟尋迎使拜詔甚恭尋遣清平官入謝貢方物復攻吐蕃取昆明城以食鹽池又破施蠻順蠻並虜其王置白崖城因定磨些蠻隸昆山西爨故地茫蠻掠楸棟蠻漠裳蠻以實雲南東北十五年異牟尋謀擊吐蕃帝許出兵助又請以大臣子弟爲質於臯舍之成都令就學且言昆明嶺州與吐蕃接不先加兵爲虜所脅反爲我患請臯圖之時

唐兵比歲屯京西朔方大峙糧欲南北並攻取故地然南方轉饟稽期兵不悉集是夏吐蕃飢疫贊普死新君立臯揣虜未敢動勸異牟尋緩舉會吐蕃大臣謀襲南詔臯乃命部將屯黎嶠二州爲援旣而吐蕃五萬分二軍攻雲南一軍攻嶺州臯將扶忠義取末恭城俘係牛羊千計吐蕃將馬定德監軍野多輸煎等俱來降虜氣衰軍不振無功而還期以明年吐蕃苦唐詔犄角亦不敢圖南詔異牟尋比年獻方物天子禮之元和三年異牟尋死遣使弔祭子尋閣勸立或謂夢湊自稱驃信夷語君也改賜元和印章明年死子勸龍晟立淫肆不道



上下怨疾十二年爲栢棟節度王嗟巔所殺立其弟勸  
利詔少府少監李銑爲冊立弔祭使勸利德嗟巔賜氏  
蒙封大容蠻謂兄爲容長慶三年始賜印是歲死弟豐  
祐立豐祐趨敢善用其下慕中國不肯連父名穆宗使  
京兆少尹韋審規持節臨冊豐祐遣洪成酋趙龍些楊  
定奇入謝天子於是西川節度使杜元穎治無狀障候  
弛沓相蒙時大和三年也嗟巔乃悉衆掩邛成雋三州  
陷之入成都止西郭十日慰賚居人市不擾肆將還乃  
掠子女工技數萬引而南人懼自殺者不勝計救兵逐  
嗟巔身自殿至大度河謂華人曰此吾南境爾去國當

哭衆號慟赴水死者十二南詔自是工文織與中國埒  
明年上表請罪比年使者來朝開成會昌間再至大中  
時李琢爲安南經畧使苛墨自私以斗鹽易一牛夷人  
不堪結南詔將段酋遷陷安南都護府號白衣沒命軍  
南詔發朱弩法苴三千助守然朝貢猶歲至從者多杜  
棕自西川入朝表無內蠻嫌豐祐怒卽慢言索質子會  
宣宗崩使者告哀是時豐祐亦死坦綽酋龍立志朝廷  
不弔卹又詔書乃賜故王以草具進使者而遣遂僭稱  
皇帝建元建極自號大禮國懿宗以其名近元宗嫌諱  
絕朝貢乃陷播州安南都護李鄴屯武州咸通元年爲

蠻所攻棄州走明年攻邕管詔湖南觀察使蔡襲發諸道兵二萬屯守南詔憚畏不敢出會詔左庶子蔡京經制嶺南忌襲功奏罷其兵南詔乃攻交州進略安南陷之詔諸軍保嶺南更以秦州經略使高駢爲安南都護南詔稍逼邕州乃大興諸道兵益戍又分兵屯容藤披蠻勢置行交州於海門五年南詔回掠雋州以搖西南西川節度使蕭鄴率屬蠻鬼主邀南詔大度河敗之明年復來攻盡殺戍卒時安南久屯兩河銳士瘴毒死者十七高駢以選士五千度江敗林邑兵於邕州遂攻交州戰數勝士酣鬪斬首三萬級安南平十年曾龍復入

寇陷嘉州黎州進攻成都次眉州蠻本無謀不能乘機會鼓行亟驅但虺結蠅營忸鹵剽小利處處留屯故蜀孺老得扶攜悉入成都閭里皆滿蠻傳外郭西川節度使盧耽遣將出兵三面苦戰蠻引却帝遣東川節度使顏慶俊以兵應接蠻聞鳳翔山南軍且來乃迎戰王師燒其攻具蠻大敗乃引去曾龍年少嗜殺戮親戚異己者皆斬兵出無寧歲男子十五以下悉發婦耕以餉軍十四年復寇蜀攻大度河陷黎州入邛州成都大震城中固守蠻至新津而還回寇黔中俄攻黎州僖宗乾符元年劫掠雋雅間破黎州入邛峽關掠成都閉三日乃

去詔以高駢領西川節度使駢至閱精騎五千逐蠻至大度河奪鎧馬執酋長五十斬之收邛崃關復取黎州南詔遁還酋龍使奉書丐和駢答曰我且將百萬衆至龍尾城問爾罪酋龍大震自南詔叛天子數遣使至其國會龍不肯拜使者遂絕駢以其俗尚浮屠法故遣浮屠景仙攝使酋龍與其下迎謁且拜乃定盟而還遣清平官酋望趙宗政質子二十入朝乞盟請爲兄弟若舅甥詔拜景仙鴻臚卿檢校左散騎常侍駢結吐蕃尚延心盟未魯耨月等爲間築戎州馬湖沐源川大度河三城列屯拒險料壯卒爲平夷軍南詔氣奪酋龍患發疽

死僞諡景莊皇帝子法嗣改元貞明承智大同自號大封人法年少好畋獵酣逸衣絳紫錦罽鏤金帶國事頗決大臣乾符四年遣陀西段璫寶詣邕州節度使辛讜請修好詔使者答報未幾寇西川駢奏請與和親右諫議大夫柳韜吏部侍郎崔澹醜其事上言遠蠻畔逆乃因浮屠誘致入議和親垂笑後世駢職上將謀乖謬不可從遂寢蠻使者再入朝議和親而駢從荆南持前請不置宰相鄭畋盧攜爭不決皆罷帝手詔問崔安潛和親事答曰雲南姚州譬一縣中國何資於彼而遣重使加厚禮彼且妄謂朝廷畏怯無能脫有他請何以待之

且天宗近屬不可下小蠻夷南詔知蜀強故襲安南陷之都護曾究奔邕府戍兵潰會西川節度使陳敬瑄申和親議時盧攜復輔政與豆盧瑑皆厚駢入譎說帝曰咸通以來蠻始叛命再入安南邕管一破黔州四盜西川遂圍盧耽召兵東方戍海門天下騷動十有五年中藏空虛士死瘡癘可謂痛心今朝廷財匱兵少安南客戍單寡鈔冬寇禍可虞誠命使臨報縱未稱臣且伐其謀外以糜服蠻夷內得蜀休息也帝謂然乃以宗室女爲安化長公主遣使許婚使還具言驃信誠欵以爲敬瑄功進其官南詔遣其宰相趙隆眉楊奇混段義宗朝

行在迎公主高駢自揚州言三人南詔腹心宜止而鳩之蠻可圖也帝從之隆眉等皆死自是謀臣盡矣蠻亦衰法死僞諡聖明文武皇帝子舜化立遣使欵黎州修好昭宗不答後中國亂不復通後唐同光三年旣平蜀魏王繼岌奏齋書招諭南詔蠻天成元年供奉官李彥楷等雲南使回雋州山後兩林百蠻都鬼主右武衛將軍李甲晚差大鬼主傅能阿花等來朝貢明宗引見加其官遣還二年七月遣使入蠻九月西川奏據黎州狀申雲南使趙和於大度河南起舍一間留信物十五籠并雜詩一卷遞至闕下宋太祖鑒唐之禍基於南詔乃

棄越雋諸郡以大度河爲界使欲爲寇則不能爲臣則不得橫山有寨宜管以西虎頭關九十里險甚所在把握峒丁結聚道路荒僻大理益不通於中國皇祐中儂智高敗奔大理其國捕之以聞熙寧九年遣使貢方物自後不常來亦不領於鴻臚政和三年廣州觀察使黃璘奏南詔大理慕義懷來願爲臣妾欲聽其入貢詔置局於賓州六年遣進奉使李紫琮等過鼎州請詣學瞻拜宣聖像許之遂遍謁見諸生又乞觀御書閣閣讀御製舉笏叩首七年至京師貢馬及麝香等制以其王段和譽爲金紫光祿大夫檢校司空雲南節度使上柱國

大理國王高宗紹興二年廣西奏大理國欲進奉及賣馬事上曰令賣馬進奉可勿許彼之進奉實利賈販但令帥臣邊將償其馬直當價則馬當繼至庶可增諸將騎兵不爲無益也六年廣西經畧司奏大理人使進奉表章國信及象馬約五月至橫山詔所進方物除不受外餘驛付行在仍計價優與回賜章表等遞進降勅書  
回答

石湖范氏桂海虞衡志曰大理南詔國也本唐小夷蒙會詔在諸部最強故號南詔自皮邏閣併五詔爲一受冊封雲南王至異牟尋封南詔王至酋龍而稱

驃信改元自稱大禮國今其與中國接乃稱大理國  
與唐史禮理字異未詳所始大理地廣人庶器械精  
良前志載之詳矣邕州右江水與大理大槃水通大  
槃在大理之威楚府而特磨道又與其善闡府者相  
接自邕州道諸蠻獠至大理不過四五十程產良馬  
可與橫山通北梗自杞南梗特磨久不得至語在大  
理馬條下乾道癸巳冬忽有大理人李觀音得董六  
斤黑張般若師等率以三字爲名凡二十三人至橫  
山議市馬出一文書字畫畧有法大畧所須文選五  
臣註五經廣注春秋後語三史加註都大本草廣註

五藏論大般若十六會序及初學記張孟押韻切韻

玉篇集聖歷百家書之類及須浮量銅器并椀

疑卽  
饒州

浮梁磁器  
書梁作量

琉璃椀壺及紫檀沉香水甘草石決明井

泉石蜜陀僧香蛤海蛤等藥稱利正二年十二月其  
後云古人有云察實者不留聲觀行者不識詞知已  
之人幸逢相謁言音未同情慮相契吾聞夫子云君  
子和而不同小人同而不和今兩國之人不期而會  
者豈不習夫子之言哉續繼短章伏乞斧伐短章有  
言音未會意相和遠隔江山萬里多之語其人皆有  
禮儀擊誦佛書碧紙金銀字相間邕人得其大悲經

稱爲坦綽趙般若宗祈禳日疾而書坦綽會望清平  
官皆其官名也邕守犒來者厚以遣歸然南詔地極  
西南當爲西戎尤邇蜀都非桂帥所當鎮撫

文獻通考卷第三百二十九

文獻通考卷第三百二十九

鄙陽馬端臨貴與著

四裔考七

驃國

唐正元十八年春正月南詔使來朝驃國王始遣其弟  
悉利移來朝華言謂之驃自謂突羅朱閣婆人謂之徒  
里拙古未嘗通中國魏晉間有著西南異方志及南中  
八郡者云永昌古哀牢國也傳聞永昌西南三千里有  
驃國君臣父子長幼有序然無見史傳者今其聞南詔  
異牟尋歸附心慕之乃因南詔重譯遣子朝貢東北距

南詔咩苴城六千八百里凡去上都萬四千里在永昌故郡南二千里餘其國境東西三千里往來通聘者迦羅婆提等二十國役屬者道林王等九城食境土者羅君潛等二百九十八部落東鄰真蠟國西接東天竺國南盡溟海北通南詔些樂城界其王姓困沒長名摩羅惹其國相名摩訶斯那其王近適則輿以金繩牀遠適則乘象嬪御甚衆侍御常數百人其羅城構以輒甃周一百六十里壕岸亦構以輒相傳本是舍利佛城內有居人數萬家佛寺百餘區其堂宇皆錯以金銀幄以丹彩地以紫鑛覆以錦罽其俗好生惡殺其土宜菽粟稻

梁無麻麥其理無刑名桎梏之具犯罪者以竹五本束之伏犯者撻其背數止五輕者止三殺人者戮之男女七歲則落髮止寺住桑門至二十五悟佛理乃復爲居人其衣服悉以白氎與朝霞繞腰而已不衣繒帛云出於蠶爲傷生也獻其國樂凡二十二曲與樂工三十五人來朝樂曲皆演釋氏經論之詞意二十一年四月封彌臣國嗣王道勿禮爲彌臣國王焉咸通三年二月遣使貢方物

### 西原蠻

西原蠻居廣容之南邕桂之西有甯氏者相承爲豪又



有黃氏居黃橙洞其隸也其地西接南詔唐天寶初黃氏強與韋氏儂氏唇齒爲寇害據十餘州韋氏周氏恥不肯附黃氏攻之逐於海濱至德初首領黃乾曜真崇鬱與陸州武陽朱蘭洞蠻皆叛推武承斐韋敬簡爲帥僭號中越王廖殿爲桂南王莫淳爲柘南王相支爲南越王梁奉爲鎮南王羅誠爲戎成王莫濬爲南海王合衆二十萬綿地數千里署置官吏攻桂管十八州所至焚廬舍掠士女更四歲不能平乾元初遣中使慰曉諸首領賜詔書赦其罪約降於是西原環右等州首領方子彈甘令暉羅承韋張九解宋原五百餘人請出兵討

承斐等歲中戰二百斬黃乾曜真崇鬱廖殿莫淳梁奉羅誠莫濬七人承斐等以餘衆面縛詣桂州降盡釋其縛差賜布帛縱之其種落張侯夏永與夷獠梁崇牽覃問及西原酋長吳功曹復合兵內寇陷道州據城五十餘日桂管經畧使邢濟擊平之執吳功曹等餘衆復圍道州刺史元結固守不能下進攻永州陷邵州留數日而去湖南團練使辛京果遣將王國良戍武崗嫉京果貪暴亦叛有衆千人侵掠州縣發使招之且服且叛建中元年城淑州以斷西原國良乃降貞元十年黃洞首領黃少卿者攻邕管圍經畧使孫公器請發嶺南兵窮

討之德宗不許命中人招諭不從俄陷欽橫潯貴四州少卿子昌沔趨勇前後陷十三州氣益振乃以唐州刺史楊旻爲容管招討經畧使引師掩賊一日六七戰皆破之侵地悉復元和初邕州擒其別帥黃承慶明年少卿等歸欵拜歸順州刺史弟少高爲有州刺史未幾復叛又有黃少度黃昌瓘二部陷賓蠻二州據之十一年攻欽橫二州邕管經畧使韋悅破走之取賓蠻二州是歲復屠巖州桂管觀察使裴行立輕其軍弱首請發兵盡誅叛者徼幸有功憲宗許之行立兵出擊彌更三歲妄奏斬獲二萬罔天子爲解自是邕容兩道沒傷疾疫

死者十八以上調費闕亡繇行立陽旻二人當時莫不咎之及安南兵亂殺都護李象古擢唐州刺史桂仲武爲都護逗留不敢進貶安州刺史以行立代之尋召還卒長慶初以容管經畧使留後嚴公素爲經畧使上表請討黃氏兵部侍郎韓愈建言曰南討損傷嶺南人希賊之所處洞壘荒僻假如盡殺其人得其地在國計不爲有益容貸羈縻比之禽獸來則捍禦去則不追未有虧損朝廷願因改元大慶普赦其罪遣官以天子恩意宣諭必能聽命乃選材用威信者處以經畧處理得方宜無侵叛不納後黃賊更攻邕州陷左江鎮攻欽州陷

千金鎮明年又寇欽州是歲黃昌玠遣其黨陳少奇二十人歸欵請降敬宗納之黃氏儂氏據州十八經畧使至遣一人詣治所稍不得意輒侵掠諸州橫州當邕江官道嶺南節度使常以兵五百戍守不能制太和中經畧使董昌齡遣子蘭討平峒穴夷其種黨諸蠻畏服有違命者必嚴罰之十八州歲輸貢賦道路清平其後儂洞最強結南詔爲助懿宗與南詔約和二洞數構敗之邕管節度使辛讜以從事徐雲虔使南詔結和齎美貨啖二洞首領儂金勒等與之通歡金勒聽命宋時儂氏世爲廣源州首領州在邕州西南鬱江之源地峭絕深

阻產黃金丹砂頗有邑居聚落自交趾蠻據有安南而廣源雖號邕管羈縻其實服役於交趾初有儂全福者知儂猶州其弟存祿知萬涯州全福妻弟儂當道知武勒州一日全福殺存祿當道并有其地交趾怒舉兵虜全福及其子智聰以歸其婦阿儂本左江武勒族也轉至儂猶州全福納之全福見虜阿儂遂嫁商人生子名智高生十三年殺其父商人曰天下豈有二父邪因冒儂姓與其母奔雷火峒其母又嫁特磨道儂夏卿久之智高復與其母出據儂猶州建國曰大歷交趾復拔儂猶州執智高釋其罪使知廣源州又以雷火頻婆回峒

及思浪州附益之居四年內怨交趾襲據安德州僭稱南天國改年景端皇祐五年寇邕州明年交趾發兵討之不克廣西轉運使蕭固遣邕州指使开贊往刺侯而贊擅發兵攻智高爲所執因問中國虛實贊爲陳大畧說智高內屬乃遣贊還奉表請歲貢方物未聽又以馴象金銀來獻朝廷以其役屬交趾拒之後復齎金函書以請知邕州陳珙上聞不報智高旣不得請又與交趾爲仇且擅山澤之利遂招納亡命數出敝衣易穀食給言峒中飢部落離散邕州信其微弱不設備也乃與廣州進士黃瑋黃師宓反其黨儂建侯儂志忠等日夜謀

入寇一夕焚其巢穴給其衆曰平生積聚今爲天火焚無以爲生計窮矣當拔邕州據廣州以自王否則兵死四年四月率衆五千沿鬱江東下攻破橫山寨遂破邕州執知州陳珙等害之智高僭號仁惠皇帝改年啓歷時天下久安嶺南州縣無備一旦兵起倉卒守將多棄城遁故智高所向得志相繼破橫貴龔潯藤梧封端康九州所至焚府庫殺官吏進圍廣州五十餘日不克解去又破昭賓二州復據邕州陳曉等兵敗朝廷命狄青爲宣撫使督諸軍進兵絕崑崙關智高悉衆拒戰大敗夜焚城遁由合江口入大理國智高自起至平幾一年

暴踐一方吏民不勝其毒朝廷爲下赦令拊瘡痍智高  
旣敗其母阿儂入保特磨依其夫儂夏卿收殘衆三千  
餘人復欲入寇安撫使余靖督部吏發峒兵入特磨掩  
襲之獲阿儂及智高弟智光等檻送京師棄市智高不  
知所終儂氏又有宗旦者知火峒稍桀黠嘉祐二年嘗  
入寇知桂州蕭固招之內屬補以官七年宗旦父子請  
以所屬城洞永爲王民詔各還一官賜賚有差是歲儂  
夏卿儂亮亦自特磨來歸皆其族也

石湖范氏桂海虞衡志曰儂智高反朝廷討平之因  
其疆域參唐制分析其種落大者爲州小者爲縣又

小者爲洞凡五十餘所推其長雄者首領籍其民爲  
壯丁以籓籬內郡障防外蠻緩急追集備禦制如官  
軍其酋皆世襲分隸諸寨總隸於提舉左江四寨二  
提舉右江四寨一提舉寨官民官也知寨主簿各一  
員掌諸洞財賦左江屯永平太平右江屯橫山掌諸  
洞烟火民丁以官兵盡護之大抵人物獷悍風俗荒  
怪不可盡以中國教法繩治姑羈縻之而已有知州  
權州監州知縣知洞皆命於安撫若監司給文帖朱  
記其次有同發遣權發遣之屬謂之官典各命於其  
州每村團又推一人爲長謂之主戶餘民皆稱提陀

猶言百姓也洞丁有爭各訟諸會會不能決若會自  
爭則訟諸寨或提舉又不能決訟諸邕管次至帥司  
而止皇祐以前知州補授不過都知兵馬使僅比徽  
校智高之亂洞人立功始有補班行者諸洞知州不  
敢坐其上視朝廷爵命尙知尊敬元豐以後漸任中  
州官近歲洞酋多寄籍內地納粟補授無非大小使  
臣或敢詣闕陳獻利害至借補閣職與帥守抗禮其  
爲招馬官者尤與州縣相狎子弟有入邕州應舉者  
招致游士多設耳目州縣文移未下已先知之輿騎  
居室服用皆擬公侯如安平州之李械田州之黃諧

皆有強兵矣民田計口給民不得典賣惟自開荒者  
由已謂之祖業口分田知州別得養印田猶圭田也  
權州以下無印記者得蔭免田旣各服屬其民又以  
攻剽山獠及博買嫁娶所得生口男女相配給田使  
耕教以武伎世世隸屬謂之家奴亦曰家丁強壯可  
教勒者謂之田子甲亦曰馬前牌皆青布巾跣足總  
謂之洞丁舊一州多不過五六百人今有以千計者  
元豐中嘗籍其數十餘萬老弱不與此籍久不脩矣  
洞丁往往勁捷能辛苦穿皮履上下山不頓其械器  
有桶子甲長槍手標偏刀邊鐔脾山弩竹箭桄榔箭

之屬其相讎殺彼此布陣各張兩翼以相包裹人多翼長者勝無他奇民居苦茅爲兩重棚謂之麻欄上以自處下蓄牛豕棚上編竹爲棧但有一牛皮爲裯席牛豕之穢升聞棧罅習慣之亦以其地多虎狼不爾則人畜俱不安深廣民居亦多如此洞人生理尤苟簡冬編鵝毛木綿夏緝蕉竹麻紵爲衣搏飯掬水以食家具藏土窖以備寇掠土產生金銀銅鉛綠丹砂翠羽洞綵練布茴香草果諸藥各逐其利不困乏今黃姓尙多而儂姓絕少蓋智高亂後儂氏善良許從國姓故今多姓趙氏舉洞純一姓者婚姻自若曾

豪或聚數妻皆曰媚娘洞官之家婚嫁以麤豪汰侈相高聘送禮儀多至千擔少亦半之婿來就親女家於五里外結草屋百餘間與居謂之入寮兩家各以鼓樂迎男女至寮女婢妾百餘婿僮僕至數百成禮之夕兩家各盛兵爲備小有言則兵刃相接成婚後婿常抽刃妻之婢妾恣意卽手殺之自入寮能多殺婢則妻黨畏之否則謂之懦半年而後歸夫家人遠出而歸者止於三十里外家遣巫提竹籃逐脫歸人帖身衣貯之籃以前導還家言爲行人收魂歸也親始死被髮持餅齏慟哭水濱擲銅錢紙錢於水汲歸

浴屍謂之買水否則隣里以爲不孝此州縣雖曰羈縻然皆耕作省地歲輸稅米於官始時國家規模宏遠以民官治理之兵官鎮壓之以諸洞財力養官軍以民丁備招集驅使上下相維有臂指之勢洞酋雖號知州縣多服皂白布袍類里正戶長參寨官皆橫梃自稱某州防遏盜賊大抵見知寨如里正之於長官奉提舉如卒伍之於主將視邕管如朝廷望經畧帥府則如神明號令風靡保障隱然比年不然諸洞不供租賦故無糧以養提舉之兵提舉兵力單弱故威令不行寨官非惟惰不舉職且日走洞官之門握

手爲市提舉官亦不復威重與之交關通賄其間有自愛稍欲振舉諸洞必共汙染之使以罪去甚則醜焉原其始皆邊吏冒法徇利致然此弊固未易悉數也故事安撫經畧使初開幕府頒鹽綵徧犒首領以公文下教謂之委曲大畧使固守邊界存卹壯丁云邕州守臣舊不輕付屯卒將五千人京師遣人作司大兵城邊備甚飭比來邕州經費匱闕觸事廢弛但存羸卒數百人城壁器械頽壞不脩安撫都監司事體腴弱州洞桀黠無所忌至掠省民客旅縛賣於交趾諸蠻又招收省民不逞及配隸亡命者以益田子



甲反隱然平視安撫都監司此非持久計慶歷廣源  
之變爲鑒豈遠哉

### 焦僥國

焦僥國後漢時通焉明帝永平中西南夷焦僥貢獻安  
帝永初中永昌徼外焦僥種夷陸賴等三千餘口舉種  
內附獻象牙水牛封牛其人長三尺穴居善游鳥獸懼  
焉其地草木冬落夏生

### 禪國

禪音擅國後漢時通焉和帝永元中其國王雍由調遣譯  
奉國珍寶和帝賜金印紫綬安帝永寧初復遣使朝賀

獻樂及幻人能變化吐火自支解易牛馬頭又善跳丸  
數乃至十自言我海西人海西卽大秦也禪國西南大  
秦明年元會安帝作樂於庭封雍由調爲漢大都尉

### 兩爨蠻

兩爨蠻自曲州靖州西南昆川曲軌晉寧喻獻安寧距  
龍和城通謂之西爨白蠻自彌鹿升麻二川南至步謂  
之東爨烏蠻西爨自云本安邑人七世祖晉南寧太守  
中國亂遂王蠻中宋元帝時南寧州刺史徐文盛召詣  
荊州有爨瓚者據其地延袤二千餘里土多駿馬犀象  
明珠旣死子震翫分統其衆隋開皇初遣使朝貢命韋

世冲以兵戍之置恭州協州昆州未幾叛史萬歲擊之  
至西洱河滇池而還震翫懼而入朝文帝誅之諸子沒  
爲奴唐高祖卽位以其子弘遠爲昆州刺史奉父喪歸  
而益州刺史段綸遣俞大施至南寧治共範川誘諸部  
皆納款貢方物太宗遣將擊西爨開青蛉棟爲縣爨蠻  
之西有徙莫祗蠻儉望蠻貞觀二十三年內屬以其地  
爲傍望覽邱求五州隸郎州都督府白水蠻地與青蛉  
弄棟接郎州亦隸弄棟西有大勃弄小勃弄二州蠻其  
西與黃瓜葉榆西洱河接其衆完富與蜀將無酋長喜  
相讎怨永徽初大勃弄楊承顛私署將帥寇麻州都督

任懷玉招之不聽高宗以左領軍將軍趙孝祖爲郎州  
道行軍總管與懷玉討之至羅仵侯山其酋禿磨蒲與  
大鬼主都干以衆塞菁口孝祖大破之夷人尙鬼謂主  
祭者爲鬼主每歲戶出一牛或一羊就其家祭之送鬼  
迎鬼必有兵因以復仇云孝祖屢破降諸部西南夷遂  
定元宗時諸爨互相並起攻稍離弱貞元中置都督府  
於峯州領羈縻州十八烏蠻與南詔世婚姻其種分七  
部落土多牛馬無布帛衣皮俗尙巫鬼無拜跪之節其  
語四譯乃通中國大部落有大鬼主百家則置千鬼主  
勿鄧部地方千里有邛部六姓又有東欽蠻粟蠻雷蠻

夢蠻散處黎嶠戎數州之鄙隸勿鄧其南七十里有兩  
林部落其南有豐習部落兩林地雖陝而諸部推爲長  
號都鬼主勿鄧豐習兩林皆謂之東蠻天寶中皆受封  
爵及南詔陷嶺州遂羈屬吐蕃貞元中復通款以數爲  
吐蕃攻獵乃遺韋臯書乞兵攻吐蕃臯遣兵大破吐蕃  
於北谷獲其鎧仗牛馬詔封其鬼主苴那時等皆爲郡  
王給印章袍帶歲給其部鹽綵後唐天成中山後兩林  
蠻遣其大鬼主來貢宋開寶二年兩林蠻王子及印部  
川蠻都鬼主入貢詔嘉納之賜以器幣由黎州南行七  
百里至其地又一程至嶺州今廢空城中但有浮圖一

又一程至建昌城又十七程至雲南三年七月又朝貢  
八年又入貢太平興國初遣使貢名馬方物乞頒正朔  
詔加其官優獎之淳化元年黎州蠻乞互市詔增給其  
直自是訖真宗朝入貢不絕每優詔加官厚賜遣之天  
聖八年十月印部川蠻王黎在遣使入貢時占城龜茲  
沙州亦皆入貢至以家自隨晏殊因請圖其人物衣冠  
并訪道里風俗以上史官詔可明道元年黎在請三歲  
一貢詔諭道路遐遠許五年一至印部於諸蠻中最驕  
悍狡譎招集蕃漢亡命侵攘他種閉其道以專利熙寧  
三年首領苴尅遣使來賀登極自稱大渡河南印部山

前山後百蠻都首賜勅書器幣襲衣銀帶苴尅死詔以  
其子韋則襲封懷化校尉大渡河南邛部川都鬼主乾  
道九年詔以崖韞承襲兄蒙備金紫光祿大夫懷化校  
尉都鬼主如故從西川宣撫司請也淳熙元年吐蕃種  
落侵犯邊境崖韞率衆掩殺詔令四川宣撫司具功狀  
聞奏二年制置使范成大奏兩林蠻王第籠畏首領崖  
來等攻邛部川之襲夔城不克虜掠而去崖韞遣人追  
逐已下黎州隄防之七年樞密院編脩官李嘉謀言黎  
州邊面近則有曰邛部川曰河南蠻曰女兒城蠻曰青  
差口吐蕃曰五部落遠則大小雲南州之三邊大抵諸

蕃環列今以馬故日至太守之庭彼旣狎玩始有內侮  
之心自今宜令通判專任市馬太守專任邊事詔市馬  
令通判專任外餘守臣措置八年崖韞死其姪墨崖承  
襲依例授官詔自今黎民屯戍土軍禁軍並聽黎州守  
臣節制其西兵遇有邊事亦聽守臣節制從編修官李  
嘉謀之言也寧宗嘉定九年邛部川爲雲南所逼折歸  
雲南初邛部鬼主部庫與其親族崖則內自攻崖則結  
兩林蠻爲援部庫聞之懼求救雲南喜其附已遂起兵  
攻兩林蠻滅之蠻族素忠順自國初以來蔽遮雲南之  
路故雲南與中國絕及是黎州失藩籬之蔽矣自黔恭

以西至涪瀘嘉叙自階文折而東南至威茂黎雅被邊  
十餘郡綿亘數千里剛夷惡獠殆千萬種自治平之末  
訖於靖康大抵皆通互市奉職貢雖時有剽掠如鼠竊  
狗偷不能爲深患云

松外諸蠻

松外諸蠻數十其部大者五六百戶小者二三凡百數  
十姓趙楊李董爲貴族皆擅山川不能相君長有城郭  
文字頗知陰陽歷數自夜郎滇池以西皆莊躋之裔有  
稻麥粟豆絲麻薤蒜桃李以十二月爲歲首布幅廣七  
寸正月蠶生二月熟男子氈革爲帔女衣絁布裙衫髻

盤如髻飯用竹筍搏而噉之鳥杯貯羹如雞彝徒跣有  
舟無車死則坎地殯舍左屋之三年乃葬以蠶蚌封棺  
父母喪斬縗布衣不澡者四五年近者二三年爲人所  
殺者子以麻括髮墨面衣不緝居喪婚嫁不廢亦弗避  
同姓壻不親迎富室娶妻納金銀牛羊酒女所齎亦如  
之有罪者樹一長木擊鼓集衆其下強盜殺之富者貫  
死燒屋奪其田盜者倍九而償贓姦淫則強族輸金銀  
請和而棄其妻處女嫠婦不坐凡相殺必報力不能則  
其部助之祭祀殺牛馬親聯畢會助以牛酒多至數百  
人唐貞觀中雋州都督劉伯英上疏言松外諸蠻率暫

附亟叛請擊之西洱河天竺道可通也居數歲太守以  
右武侯將軍梁建方發蜀十二州兵進討酋帥雙舍拒  
戰敗走殺獲十餘萬羣蠻震駭走保山谷建方諭降者  
七十餘部戶十萬九千署首領蒙和爲縣令餘衆感悅  
西洱河蠻亦曰河蠻道繇郎州走三千里建方遣其兵  
自鶴州道千五百里掩之其帥楊盛大駭欲遁去使者  
好語約降乃遣首領十人納欵軍門建方振旅還二十  
二年西洱河大首領楊斂松外首領蒙羽皆入朝授官  
秩顯慶元年西洱河大首領楊棟附顯和蠻大首王羅  
祁郎昆梨盤四州大首領王伽衝率部落四千人歸附

入朝貢方物其後茂州西南築安戎城絕吐蕃通蠻之  
道生羌爲吐蕃鄉導攻拔之增兵以守西洱河諸蠻皆  
臣吐蕃開元中首領始入朝授刺史會南詔蒙歸義拔  
大河城乃北徙更羈制於浪穹詔浪穹詔已破又徙雲  
南柘城黎州領羈縻奉上等州二十六開元十七年又  
領羈縻夏梁卜貴等州三十一

### 尾濮

尾濮漢魏以後在興右郡

今雲南郡地

西南千五百里徼外

其人有尾長三四寸欲坐輒先穿地爲穴以安其尾尾  
折便死居木上食人俗又噉其老者唯識母不識父其

俗有賓客殺老以供厨故賓婚有日老者必泣其地有  
稷及陸稻多鹽井饒犀象有弓矢革鎧以赤獠猴皮垂  
錫珠翡翠爲冠幘按木濮卽尾濮也又按南土俗傳云  
拘利東有蒲羅中  
人人有尾長五六寸其俗食人按  
其地並西南蒲羅蓋尾濮之地名

### 木綿濮

木綿濮土有木綿樹多葉又生房甚繁房中綿如蠶所  
作其大如捲音拳

### 文面濮

文面濮其俗劊面以青畫之劊音讒

### 折腰濮

折腰濮其俗生子皆折其腰

### 赤口濮

赤口濮在永昌南其俗折其齒劊其唇使赤又露身無  
衣服

### 黑熨濮

黑熨濮在永昌西南山居耐勤苦其衣服婦人一幅布  
爲裙或以貫頭丈夫以穀皮爲衣其境出白蹄牛犀象  
琥珀金桐華布又諸濮之域皆出楛矢爾雅曰南至於  
濮鈇周書王會卜人丹沙注云卜人西南之蠻丹沙所  
出今按卜人蓋濮人也按諸濮與哀牢  
地相接故附之

交趾

交趾本漢初南越之地漢武帝平南越分其地爲儋耳珠厓南海蒼梧鬱林合浦交趾日南九真凡九郡置交趾刺史以領之後漢置交州晉宋齊因之又爲交趾郡陳亦因之隋平陳廢郡置州煬帝初廢州置郡唐武德中改交州總管府至德中改安南都護府朱梁正明中土豪曲承美專有其地送欵於末帝因授承美節鉞時劉陟擅命嶺表遣將李和順伐承美執之乃并其土宇後有楊廷藝紹洪皆受廣南僞署繼爲交趾節度使紹洪卒州將吳昌岌遂居其位昌岌死其弟昌文承襲宋

乾德初昌文死其參謀吳處珩峯州刺史矯知護武寧州刺史楊暉牙將杜景碩等爭立管內十二州大亂部民嘯聚起爲寇盜攻交州先是楊廷藝以牙將丁公著攝驩州刺史兼禦蕃都督部領卽其子也公著死部領繼之至是部領與其子璉率兵擊敗處珩等賊黨潰散境內安堵部民德之乃推部領爲交州帥號曰大勝王署其子璉以爲節度使凡三年璉襲父位立七年聞太祖克平嶺表遂遣使貢方物上表內附制授璉檢校太師靜海軍節度使安南都護其進奉使皆命以官八年遣使貢犀象香藥是歲秋制授開府儀同三司檢校太



師封交趾郡王太宗卽位璉又貢方物璉死弟璿尚幼嗣立大將黎桓擅權劫遷璿於別第舉族禁錮代總其衆太宗聞之怒議舉兵弔伐太平興國五年詔孫全興張璿崔亮以陸路兵自邕州路入劉澄賈湜王僕等以水路兵自廣州路入是歲黎桓遣使貢方物仍爲丁璿上表乞襲位上察其欲緩王師寢不報是時王師進討破賊萬餘衆斬首萬餘級六年春又破賊於白藤江口斬首千餘級獲戰艦二百艘甲冑萬計轉運使侯仁寶率前軍先進全興等頓兵花步七十日以俟澄仁寶累促之不進及澄至并軍由水路至多羅村不遇賊復擅

迴花步桓詐降以誘仁寶遂爲其所害轉運許仲宣馳奏其事遂班師上遣使就劾澄湜僕澄尋病死湜等具伏並戮於邕州市全興至闕亦下吏坐誅餘抵罪有差仁寶贈工部侍郎七年桓懼朝廷終行討滅復以丁璿爲名遣使貢方物上表謝罪八年桓自稱權交州三使留後遣牙將入貢上表自陳上賜詔書因而撫之仍諭以遣丁璿母子及其親屬盡室來歸當降制授卿節麾時黎桓已專據其土不聽命是歲五月上言占城國水陸象馬數萬來寇蠻以部兵擊走之繫斬千計雍熙二年復遣使貢方物上表求正領節鎮三年秋又遣使入

貢儋州言占城國人蒲羅遏率其族百餘衆內附言爲  
交州所逼故也是歲十月制授桓檢校太保使持節都  
督交州諸軍事安南都護充靜海軍節度使交州管內  
觀察處置等使封京兆郡侯賜食邑功臣號端拱元年  
加檢校太尉淳化元年加特進遣左正言直史館宋鎬  
往使鎬歸闕上令條列山川形勢事跡以聞鎬等具奏  
曰去歲秋末抵交州境桓遣牙內都指揮使丁承正等  
以船九艘卒三百人至太平軍來迎由海口入大海冒  
涉風濤頗歷危險經半月至白藤徑入海汊乘潮而行  
几宿泊之所有茅舍三間營葺尚新目爲館驛至長州

漸近本國桓張皇虛誕務爲誇詫盡出舟戰擢謂之耀  
軍自是宵征抵海岸至交州僅十五里有茅亭五問題  
曰茅徑驛至城一百里驅部民畜妄稱官牛數不滿千  
揚言十萬又廣率其民混爲軍旅衣以雜色之衣乘船  
鼓噪近城之山虛張白旗以爲陳兵之象俄而擁從桓  
至展郊迎之禮斂馬側身問皇帝起居畢按轡偕行時  
以檳榔相遺馬上食之此風俗待賓之厚意也城中無  
居民止有茅竹屋數十百區以爲軍營而府署湫溢題  
其門曰明德門桓質陋而目眇自言近歲與蠻寇接戰  
墜馬傷足受詔不拜信宿之後乃張筵飲宴又出臨汊

以爲娛賓之游桓跣足持竿入水標魚每中一魚左右皆叫譟歡躍凡有宴會預坐之人悉令解帶冠以帽子桓多衣纈及紅色之衣帽以真珠爲飾或自歌勸酒莫能曉其辭嘗令數十人扛大蛇長數丈饋於使館且曰若能食此當治之爲饌以獻焉又羈送二虎以備縱觀皆却之不受士卒殆三千人悉黥額曰天子軍量以禾穗日給令自舂爲食兵器止有弓弩木牌梭槍竹槍弱不可用桓輕脫殘忍昵比小人腹心闇監五七輩錯立其側好狎飲以手令爲樂凡官屬善其事者擢居親近左右有小過亦殺之或鞭其背一百至二百賓佐小不

如意亦捶之三十至五十黜爲閹吏怒息乃召復其位有木塔其制樸陋桓一日請同遊覽地無寒氣十一月猶衣夾衣揮扇四年進封桓交趾郡王五年遣牙校費崇德等來脩貢然桓性本凶狠負阻山河屢爲寇害漸失藩臣之禮至道元年春廣西路轉運使張觀欽州如洪鎮兵馬監押衛昭美皆上言有交趾戰船百餘艘寇如洪鎮掠居民劫廩實而去其夏桓所管蘇茂州又以鄉兵五千寇邕州所管祿山都巡檢楊文傑擊走之太宗志在撫寧荒服不欲問罪旣而遣李若拙賫詔并美玉帶往賜旣至桓出郊迎然辭氣尚悖慢謂若拙曰向

者劫如洪鎮乃外境蠻賊也皇帝知此非交州兵否若使交果叛命當首攻番禺次擊閩越豈止如洪鎮而已若拙從容以語折之桓頓首謝真宗卽位封南平王兼侍中桓遣使來貢賜詔書慰獎先是使至交州桓卽以貢賦爲辭因緣賦歛上聞之止令疆吏名受綸命而不復專遣使者景德元年遣其子攝驩州刺史明提來貢懇加恩使至本道慰撫遐裔許之三年桓卒立中子龍鉞兄龍全劫庫財而遁其弟龍廷殺龍鉞自立兄明護率扶闌寨攻戰明提以國亂不能還詔廣州優加資給乃以邵晔爲沿海安撫使令曉譬之晔貽書交州諭以

朝廷威德如其自相魚肉久無定位偏師問罪則黎氏盡滅矣明護懼卽奉龍廷主軍事欲脩貢詔許之乃遣弟峯州刺史明昶等入貢詔授龍廷檢校太尉靜海軍節度處置等使安南都護御史大夫上柱國交趾郡王賜食邑功臣號仍賜名至忠又追贈桓中書令南越王官其進奉使太中祥符元年東封畢加同平章事增食邑功臣號至忠遣使入獻三年求互市於邕州詔止仍舊制止許於廉州及如洪寨互市蓋以邕爲邊隅控扼之所或直趨內地事非便故也至忠裁年二十六苛虐不法國人不附大校李公蘊尤爲至忠親任嘗令以黎

爲姓其年遂圖至忠逐殺其弟明提明昶等自稱留後遣使奉貢上曰黎桓不義而得公蘊尤而效之甚可惡也然以蠻俗不足責遂用桓故事授公蘊檢校太傅節度都護御史大夫上柱國交趾郡王實封功臣號後加同平章事開府儀同三司又官其進奉使其後或間歲或仍歲以方物入貢天禧中進封南平郡王檢校太尉仁宗卽位入貢加檢校太師天聖六年卒子德政遣使告哀詔命使弔祭贈公蘊侍中南越王授德政襲爵明道初加同平章事景祐初部人陳公永等六百餘人內附德政遣兵千餘境上捕逐之詔遣還仍詔德政毋輒

誅殺尋遣使入貢加檢校太師三年其甲峒及諒州門州蘇茂州廣源州大發峒丹波縣等蠻寇邕州之思陵州西平州石西州及諸峒畧居人馬牛焚室廬而去下詔責問且令捕酋首正其罪以聞寶元元年進封南平王康定元年慶歷三年六月七月俱遣使入貢詔官其貢使初德政發兵取占城朝廷疑其內蓄姦謀乃訪自唐以來所通道路凡十六處令轉運使杜杞度其要害而戍守之然其後亦未嘗寇邊前後累貢馴象皇祐二年邕州誘其蘇茂州韋紹嗣紹欽等三千餘人入居省地德政表求所誘詔盡還之仍令德政約束邊戶毋得

侵犯其後儂智高反德政率兵二萬由水路欲入助王師朝廷優賜而却其兵至和二年德政卒子日尊遣人告哀詔遣使弔祭贈官及命日尊世襲如故事嘉祐三年貢異獸四年寇欽州思廩管五年與甲峒賊寇邕州詔知桂州蕭固轉運使宋咸提刑李師中同議掩擊之路兵甲趨交趾日尊惶怖上表待罪詔未得舉兵聽其貢奉八年入貢四月以仁宗皇帝遺留物賜日尊加同平章事神宗卽位進封南平王加開府儀同三司二年表言占城國久缺貢臣親帥兵討之虜其王詔官其使

自是日尊自帝其國僭稱法天應運崇仁至道慶成龍祥英武睿文尊德聖神皇帝尊公蘊爲太祖神武皇帝國號大越僞改元寶象又改神武五年日尊卒子乾德嗣來告哀詔遣使弔贈授乾德襲封如故乾德幼母黎氏號太妃與宦人李尙吉同主國事於是知桂州沈起籍溪峒丁爲王民擅納知恩倩州儂善美於內地帝慮其妄發以激蠻禍亟罷之代以劉彝乾德乞還善美并其屬民七百人許彝又言廣源州劉紀以兵畧邕管歸化州儂智會率其子進安逆戰有功詔授進安供奉官初廣西屯北兵二十指揮交人畏之彝奏罷正兵而

用槍仗手分戍聽偏校言以爲安南可取大治戈船交  
人來互市率皆遏絕表疏上訴亦不得通八年冬遂分  
三道入寇一自欽州一自廣府一自崑崙關連陷欽廉  
二州廉土丁八十守城皆驅令負擔登舟已而盡殺之  
又陷邕州殺守將蘇緘屠其民五萬餘口詔以趙嵩爲  
安南道行營都總管經畧招討使李憲爲副使帥大軍  
南征尋罷憲而以宣徽南院使郭遠爲招討使改嵩副  
之九年十二月破蠻決里隘次富良江蠻以精兵乘船  
逆戰遠擊破之殺其王子洪真乾德懼遣使奉表詣軍  
門納款富良去其國不遠遠不敢渡官軍八萬死者什

六得其廣源州門州思浪州蘇茂州及枕榔縣而還遠  
嵩皆得罪詔改廣源爲順州命西上閣門使陶弼知州  
事餘皆卽用其酋長乾德乞再修職貢還所奪州縣詔  
報之曰卿撫有南交世受王爵而乃背德奸命切暴邊  
城棄祖考忠順之圖煩朝廷討伐之舉師行深入勢蹙  
始歸迹其罪尤在所絀削今遣使修貢上章致恭詳觀  
辭情灼見悛悔朕撫綏萬國不異邇遐但以邕欽廉之  
民遷劫炎陬久失鄉井俟盡送還省界卽以廣源等賜  
交州乾德初約歸三州官吏千人久之才送民二百二  
十一口男子年十五以上皆刺額曰天子兵二十以上

日投南朝婦人刺左手曰官客以舟載之而泥其戶牖中設燭燭日行一二十里則止而僞作更鼓以報凡數月乃至蓋以給示海道之遠也順州落南深置戍鎮守被罹瘴霧多病沒陶弼亦終於官朝廷知其無用乃悉以四州一縣還之然廣源舊隸邕管羈縻本非交趾所有也元豐五年獻馴象二犀角象齒百六年以追捕儂智會爲辭犯歸化州又遣其臣黎文盛來廣西辨理順安歸化境界經畧熊本遣左江巡檢成卓與議文盛稱陪臣不敢爭執詔以文盛能遵乾德恭順之意賜之袍帶及絹五百疋仍以八隘之外保樂六縣宿桑二峒予

乾德哲宗立加同中書門下平章事元祐中又數上表求勿惡勿陽峒地詔不許二年遣使入貢進封南平王徽宗時累加開府儀同三司檢校太師大觀初貢使至京乞市書籍有司言法不許詔嘉其慕義除禁書卜筮陰陽歷算術數兵書勅令時務邊機地里外餘書許買政和末又詔以交人自熙寧以來全不生事特寬和市之禁宣和元年加乾德守司空建炎元年乾德上表乞禁本道邊兵逃入省地詔令廣西經畧司約束四年入貢邊事未寧免使人詣闕所進方物除華靡不受餘就界所交從本路提刑司依例計價回賜其表遞進令學



士院降勅書回答自後每遇入貢卽行之紹興二年乾德卒子陽煥立八年陽煥卒子天祚立俱遣使弔祭贈官襲封如故事九年廣西帥司言乾德有側室子奔入大理改姓趙名智之自號南平王知陽煥死大理遣還欲與天祚爭位天祚與之敵又聞趙智之欲進奉借兵見已說諭約四詔却之自後貢奉不絕累加功臣號二十五年加檢校太師增食邑孝宗卽位加功臣號隆興二年遣使尹子思等入貢九年復遣入貢自上卽位每遣使來邊吏以聞諭使歸國至是懇忱備至上錄其善意許焉至館於懷遠驛禮部以安南使久不至移文客

省詢訪土俗人物圖畫衣貌如舊制焉淳熙元年正月引見安南進奉副使二年詔安南入貢禮意可嘉令有司討論賜國名典故以聞於是特賜安南國名制南平王李天祚特授依前官封安南國王仍加守謙功臣上以天祚嗣位四十年故厚其禮封以安南國焉舊日章奏行移止稱安南道加封之後浸自尊太文書稱國不復可改矣押伴安南進奉梁衍言安南入貢所過州縣差夫數多自靜江水路可至容州又自北流遵陸一百二十里至鬱林自鬱林州水路可至廣州皆有回脚鹽船運鹽牛車可顧自廉航海一日之程卽交趾則從靜

江而南二千餘里可不役一夫而辦詔逐路帥臣詳其陳行旣而尹子思等以爲涉夏水溢乞依例由欽州路以歸二年安南國請印以安南國王之印六字爲文賜之其印比附樞密尙書省印方二寸仍給牌皆以銅鑄塗金爲飾三年賜安南國歷日有司言天祚已薨其子未有封爵欲作賜安南國王嗣子龍翰勅書從之四年授龍翰襲爵故事其王初立即封交趾郡王久之進南平王死則贈侍中南越王時詞臣周必大行制曰卽樂國以肇封旣從世襲極真王而錫命何待次升言不復封郡王蓋異禮也五年上表進方物稱謝九年廣西經

畧司言安南國已辦方物投進上曰象乃無用之物經由道路重擾吾民却不受其入貢之物十受一光宗登極經畧司言安南國修章表備土宜貢賀詔受一分於界首交割本司言紹興中壽皇登極貢物盡行收受今若止受十一之數却恐本國致疑禮部勘當如隆興例全受不回賜寧宗嗣位依例賜器幣加食邑功臣號嘉定五年龍翰薨詔遣弔祭贈官如故事以子吳昂襲封其爵位給賜如龍翰始封之制自李公蘊篡奪之後至吳昂傳八世其名曰日日乾曰陽曰天曰龍皆有僭上之意而累朝以其僻在海隅不復與較也

石湖范氏桂海虞衡志曰今安南國地接漢九真日南諸郡及唐驩愛等州東南薄海接占城占城林邑也東海路通欽廉西出諸蠻西北通邕州在邕州東南隅去左江太平寨最近自寨正南行至桃榔花步渡富良白藤兩江四程可至又自寨東南行過丹特羅小江自諒州入六程可至自右江溫潤寨則最遠由欽州渡海一日至歷代爲郡縣國朝遂在化外丁氏黎氏李氏代擅其地熙寧間乾德初立其大臣用事嗾之叛八年遂入寇陷邕欽廉三州朝廷命郭逵等討之賊驅象拒戰官軍以大刀斬象鼻象奔却自

蹂其徒大兵乘之賊潰棄勝拔桃榔縣知縣交主之壻逃伏草間窺見王師獲賊孽食之以爲天神歸報其主曰苟可逃命子孫勿犯大朝大軍次富良江去都護府四十里殺僞太子擒其大將乾德大懼奉表乞降會北兵多病瘴乃詔赦交趾還其五州朝廷以逵不能遂取交州黜爲武衛上將軍是役也調民夫八十七萬有奇金穀稱是迄無駿功大率自端拱迄嘉祐以來兩江州洞數爲蠻所侵軼潛舉以外鄉蘇茂廣源甲洞等處入交趾者六十二村故至今長雄諸蠻乾德死子陽煥立陽煥死乾德有遺腹子屬之

占城奉而立之或云有黎牟者乾德妻黨也嘗爲李氏養子殺遺腹子而立冒姓李氏名天祚實紹興九年其國人猶稱黎王二十六年遣使入貢朝廷因以李氏官爵命之天祚貌豐皙今生三十九年矣有兄嘗知諒州謀奪其位事覺流雪河州髡爲浮屠凡與廣西帥司及邕州通訊問用二黑漆板夾繫文書刻字於板上謂之木夾文書稱安南都護府天祚不列銜而列其將佐數人皆僭官稱有云金紫光祿大夫守中書侍郎同判都護府者其意似以都護府如州郡簽廳也帥司邊州報其文書亦用木夾桂林掌故

有元祐熙寧間所藏舊案交人行移與今正同印文曰南越國印近年乃更用中書門下之印中國之治略荒遠邊吏又憚生事例置不問由來非一日矣其國之官稱王宗族稱天王班凡族稱承嗣餘稱支嗣有內職外職內職治民曰輔國太尉猶宰相也左右郎司空左右郎相左右諫議大夫內侍員外郎以上爲內職外職治兵曰樞密使金吾太尉都領兵領兵使又有判及同判安南都護府皆爲外職仕者或科舉或任子或入貲科舉最貴工技奴婢之子孫不許應舉入貲始爲吏職再入貲補承信郎可累遷爲知

州在官者無俸給但付一方之民俾得役屬耕漁以  
取利勝兵卸龍武勝龍翼蟬殿光武王階捧日保勝  
等皆有左右每軍止二百人橫刺字於額曰天子兵  
又有雄略勇捷等九軍充給使如廂軍兵士月一踐  
更暇則耕種工藝自給正月七日人給錢三百紬絹  
布各一疋如紬綱而蒙之以綿月給禾十束以元日  
犒軍人得大禾飯一杵魚鮓數枚其地多占米故以  
大禾爲貴正月四日酋椎牛饗其臣七月五日爲大  
節人相慶遺官僚以生口獻其酋翌日酋開宴酬之  
酋居樓四層上以自居第二層御宙居之中人也第

三層箇利就居之老鈴下之屬也第四層軍士居之  
又有水晶宮天元殿等諸僭擬名字門別有一樓猶  
榜曰安南都護府屋皆朱漆柱畫龍鶴仙女交人無  
貴賤皆椎髻跣足酋平居亦然但珥金簪衣黃衫紫  
裙餘皆服盤領四裙皂衫不繫腰衫下繫皂裙珥銀  
鐵簪曳皮履執鸛羽扇戴螺笠皮履以皮爲底施小  
柱以拇指夾之而行扇編鸛羽以辟蛇螺笠竹絲縷  
織狀如田螺最爲工緻婦人多哲與男子絕異好着  
綠寬袖直領皆以皂裙束之酋出入以人輓車貴僚  
坐幅布上掛大竹兩夫舁之名抵鴟歲時不供先病

不服藥夜不燃燈上巳日男女集會爲行列結五色  
綵爲毬歌而拋之謂之飛馳男女自成列女受馳男  
婚以定宮門有大鐘樓民訴事卽撞鐘大辟或付仇  
家使甘心盜賊斫手足指逃亡斷手足謀叛者埋身  
土中露其頭旁植長竿挽竹繫其髻使其頸伸利錘  
一剗之其頭剗標竿杪客死境外鞭尸大罵以爲背  
國土產生金及銀銅朱砂珠貝犀象翠羽車渠諸香  
及鹽漆吉貝之屬果惟有甘橘香圓檳榔扶留藤新  
舊縣隔一小江皆出香新州故真臘地侵得之不能  
造紙筆求之省地其人少通文墨閩人附海舶往者

必厚遇之因命之官咨以決事凡文移詭亂多自遊  
客出相傳其祖公蘊亦本閩人又其國土人極少半  
是省民南州客旅誘人作婢僕擔夫至州洞則縛而  
賣之一人取黃金二兩州洞轉賣入交趾取黃金三  
兩歲不下數百千人有藝能者金倍之知文書者又  
倍面縛驅行仰繫其首俾不省來路旣出其國各認  
買主爲奴終身皆刺額上爲四五字婦人刺胷乳至  
肋拘繫嚴酷逃亡必殺又有秀才僧道伎術及配隸  
亡命逃奔之者甚多不能鼓鑄泉貨純用中國小銅  
錢皆商旅洩而出者按掠賣婢奴與士人遊邊及透

漏錢寶出外界三者法禁具在今玩弊如此蓋安撫  
都監沿邊溪洞司不得人邊政頽靡姦宄肆行所致  
日滋月長未艾也及邊吏多無財用植立竊斗升癘  
土苟活待盡而已何暇顧邊防國事者宜痛心疾首  
焉然交人自熙寧敗降後亦不復敢猖獗南陲奠枕  
且百年紹興十二年妖人譚友諒竄入思浪州詐稱  
奉使諭下州洞天祚大恐已而帥司檄安南捕友諒  
邕州又以僞官告身招之友諒與歸順首領二十餘  
人各奉其銅印地圖土物詣橫山知邕州趙願縛友  
諒赴帥司斬之首領悉送還安南皆死交趾安居至

今無議之者乾道八年春上言願朝賀聖主登極詔  
廣西經略司貢使來者免至廷方物受什一其秋復  
有詔下經略司買馴象十以備郊祀鹵簿經略李德  
遠浩用木夾事移交趾買之蠻報不願賣願以備貢  
明年春余至官屢引前詔却其貢祀期寢近朝命督  
象若星火蠻復款塞六象及方物將至塞下若不許  
貢皆引歸小蕃寧敢與朝廷爲市余以其狀聞且移  
書時相謂欲却其貢併象勿須可也祀以一純二精  
寧乏此俄有金字牌下差官押伴至闕比及桂林已  
秋末以十象爲賀登極綱五象爲進奉大禮綱表字

如蠅頭僅可見其象飾禮物則有金御乘象羅我羅  
我如鞍架之狀及金裝象牙鞘金象額金銀裏象鈎  
連同心帶金間銀裝象額金銀裝朱纏象藤條金鍍  
銅裝象脚鈴裝象銅鐸連鐵索御乘象繡坐簟裝象  
犖牛花朵御乘象朱梯御羅我同心龍頭帶等餘物  
則有金銀鈔羅沉水香等大使稱中衛大夫尹子思  
正使承議郎李邦正副使忠翊郎阮文獻其下有職  
員書狀官都衙通引知客監綱孔目行首押衙教練  
象公長行防授官之屬此等入朝則稍更其服器使  
者幞頭靴笏紅鞋金帶犀帶每夸以金箱之又以香

膏沐髮如漆裹細摺烏紗巾足加履鞮使者乘涼輦  
釘較髹漆甚飭蓋得至中國盡變椎髻徒跣抵鴉之  
制先是紹興二十六年嘗入貢參知政事施公大任  
帥桂循舊例以刺字報謁且用行厨宴於其館余悉  
罷之使者私謂衙校曰施參政惠顧厚今奈何悉罷  
去余使人諭之曰經略使司與安南都護府埒經略  
使與南平王比肩使者是都護府小官纔與桂林曹  
掾官比法當廷參不然不見也使者屈伏遂廷參其  
歸也至欲列拜余使人掖之曰免拜余奏其事且著  
於籍以爲定制又辨今安南非古交趾

已見輿地考  
交州條下不



文獻通考卷第三百三十

文獻通考卷第三百三十一

鄱陽馬端臨貴與著

四裔考八

南丹州蠻

南丹州蠻亦溪洞之種其地與宜州接宋開寶七年酋帥莫洪普遣使奉表求內附九年復來貢求賜牌印詔刻印以給之太平興國五年貢銀百兩賀平太原雍熙四年洪普族人莫淮闖以河池縣知縣余承鑒取其牛怒而劫掠誘羣蠻為寇詔誅承鑒以知宜州侯汀失於備禦免官發諸州兵進討未至而蠻已遁詔拊諭之自

是不復寇淳化元年洪普卒其子洪皓襲稱刺史遣使入貢上降優詔賜綵自洪普領州十餘年歲輸白金百兩洪皓襲兄位專地利不修常貢其弟洪玩忿之挈妻子來奔宜州洪皓數引兵攻洪玩乃乘傳詣闕訴其事請發兵致討上以其蠻夷但羈縻而已不欲爲之興師報怨洪玩先自稱南丹州副使以爲邵州團練副使給田十頃下詔戒飭洪皓景德二年洪皓死長子淮勅襲父任俄爲其弟淮迪所逐遂以淮迪知南丹州淮勅帥屬來奔詔宜州賜閑田資給之大中祥符九年討撫水蠻詔淮迪約勒溪峒勿從誘脅明年平撫水蠻淮迪等

以勞進秩景祐三年淮迪老自言願傳其子世漸至和元年命世漸爲檢校散騎常侍權發遣州事明年以淮迪爲懷遠大將軍致仕世漸爲刺史檢校工部尚書賜袍帶錢十萬絹百疋又補其親黨數十人爲檢校官如故事也世漸死嘉祐末命其子公帳襲之有世忍者亦淮迪子也初率其屬入內附治平初逃歸攻殺公帳奪其地自守請於朝廷願授刺史補其親黨如故事歲輸銀百兩三年遂命爲刺史皆如其請熙寧二年授世忍檢校禮部尚書元豐三年入貢其印以西南諸道武盛軍德政官家夫國主爲文詔以南丹州印賜之令毀其

舊印六年遷檢校戶部尚書官其子姪九人世忍死子公佺襲大觀元年廣西經略使王祖道言公佺就擒進築平允從州收文地蘭那安外習南丹八州之地併爲鎮庭孚觀州延德軍以其弟公晟襲刺史宣和四年公晟乞以州事傳其姪延豐願與其子歸朝詔從之仍乘驛給券紹興三年廣西經略安撫劉亮適言南丹州莫公晟領賊圍打觀州燒毀寶積監宰臣朱勝非奏此皆是大觀及宣和以來所開新邊近來徃徃棄而不守如觀州屢下本路帥臣監司相度皆以爲所據控扼不宜棄之上曰前日用事之臣貪功生事公爲欺罔其實勞

民費財使遠俗不安也亮適又言公晟自添差路分鈐轄逃去後未曾差官乞先與一職名欲於遙郡下添入知南丹州兼溪峒都巡檢使提舉盜賊公事舊賜南丹州刺史印記今依舊行使從之而公晟未出受命至二十四年廣西經略安撫司言愿忠言莫公晟進馬與諸蠻首領並皆歸順令公晟守本官致仕以其子延沈承襲上諭輔臣曰得南丹州非以廣地但徭人不作過百姓安業可喜於是延沈承襲銀青光祿大夫檢校太子賓客使持節南丹州諸軍事南丹州刺史兼御史大夫知南丹州公事武騎尉愿忠又奏說諭到諸蠻三十一

種族計二十七州一百三十五縣四十寨一鎮三十二團一百七十九峒皆納款面內乞作羈縻州縣實爲熙朝盛事明年又加延沈團練防禦使三十一年廣西諸司言莫延沈恣行慘酷爲諸蠻迫逐歸投省地而死衆共推莫延廩承襲知南丹州詔依例補授官孝宗隆興初延廩以諸蠻謀害攜家歸朝廷延甚管州事經略司保奏以聞詔延甚承襲知南丹州淳熙元年南丹州爲永樂州所攻使來告急廣西帥差官齎旗榜往二州說諭聽從和斛十四年經略司奏莫延蔭乞承襲延甚官爵詔從之寧宗嘉定五年詔以莫延蔭男莫光照承襲

知南丹州從經略司所請也

石湖范氏桂海虞衡志曰南丹在宜州西境地產竒材異藥惡獸毒虺其人剽悍以勁木爲弩聚毒傅矢中人立死宜之高峯寨古觀州也與南丹接境地勢極高南丹對境亦高二壘矢可相及南丹日通市於高峯少不如意則怨毒思亂其酋莫氏國朝命爲刺史月支鹽料及守臣供給錢百五十千比內郡自號莫大王間入宜州則禮之以列郡來已數十年矣其說以爲宜州徼外西原黃洞武陽羣小蠻卽唐黃家賊之地崇建丹使控制之然莫氏家人亦時自相攻

剽今刺史莫延甚逐其弟延廩而自立延廩奔朝廷  
謂之出宋凡州洞歸朝延甚淫酷不能服其類隣永

皆稱出宋

樂州王氏與爲仇歲相攻乾道丁亥與王氏戰敗告  
急於帥司帥司遣官爲和解永樂益涿勵有勝兵萬  
人志滅莫氏延甚乃益驕不奉法至私刻經略安撫  
司及宜州溪洞司印效帥守花書行移以嚇諸蕃落  
已丑歲自言州去產馬蠻不遠願與國買馬乞於宜  
州置場意欲藉朝廷任使威制永樂邊將常恭與交  
通至爲代作奏章至闕下不經由帥司樞密院是其  
說差官置司宜州余論奏宜州密邇內地無故通道

諸蠻且開邊隙不敢奉詔且自行在所捕得常恭囚  
而劾奏其事朝廷大悟削籍竄之九江永不放還外  
有省民冒法商販入南丹受其帖牒至內地幹事者  
多桂之興安人余亦物色得其渠送獄論如法南丹  
稍讐

### 撫水蠻

撫水蠻在宜州南有縣四曰撫水曰京水曰多建曰古  
勞唐隸黔南其酋皆蒙姓同出有上中下三房民則有  
區廖潘吳四姓亦種水田採魚其保聚山險者雖畚田  
收穀粟甚少但以藥箭射生取鳥獸盡卽徙他處無羊

馬桑柘地曰帚洞五十里至前村川原稍平合五百餘家夾龍江居種稻似湖湘中有樓屋戰棚衛以竹柵卽其酋所居兵器有環刀標牌木弩善爲藥箭中者大叫信宿死得邕藥解之卽活宋雍熙中數寇邊境掠取民口畜產詔書招安補其酋蒙令地殿直蒙令札奉職咸平中又數爲寇盜上令邊臣驅逐出境其黨狡獪者凡三十餘人宜州守將因擒送闕下上召見詰責之對曰臣等蠻陬小民爲飢寒所迫耳上顧謂左右曰昨不欲盡令殺戮顧無噍類矣因釋罪賜錦袍冠帶銀綵戒勗遣還逾年酋長蒙頂等六十五人詣闕納器甲百七十

事又蒙漢誠蒙虔瑋蒙換來朝上器甲數百及毒箭藥誓不騷邊比歲皆遣使來貢及輸兵器乃授漢誠官賜物有差旣而侵軼如故太中祥符九年數寇宜融州界詔以知宜州董元巳不善撫綏黜之仍行招撫羣蠻拒命侵掠不已乃命平州刺史曹克明領兵討之傷殺甚衆蠻逃竄窮蹙酋帥蒙承貴等面縛詣軍自首悉還所掠漢口資畜軟血立誓不敢復叛乃還師詔以撫水州爲安化州撫水縣爲歸仁縣京水縣爲長寧縣自是間歲朝貢不復爲邊患寶元元年寇宜融等州發兵討之踰年乃定慶歷嘉祐間再入貢其後首領月赴宜州參

謁及貿巨板每歲州四管犒及三歲聽輸所貢兵械於  
思立寨以其直償之遞以官資遷補熙寧初知宜州錢  
師孟等擅裁損侵削之土人羅世念等爲亂攻殺寨官  
詔遣兵討之未入境明年世念等率其徒來降各拜官  
崇寧三年復嘯聚爲寇經略司遣兵擊却之大觀二年  
以三州一鎮戶口六萬一千來上詔知融州程鄰往黔  
南路撫諭官吏推恩有差紹興二年蠻酋蒙全劍等寇  
掠省地詔帥司討平之二十九年詔加安化上州蒙自  
臨等七人官勲及賜錢帛有差孝宗淳熙十一年以知  
宜州馬寧祖減刻蠻人生料錢鹽致令犯邊降一官十

一二年廣西經略司言蠻人出犯省地多用强弩藥箭本  
路造木弩五十架給付兩路踏射并造藥箭備用詔常  
加閱習

石湖范氏桂海虞衡志曰安化州最驚悍在宜州西  
境官月給生料鹽以拊之猶日侵省地以耕民不敢  
與爭州亦不敢禁頃有凌羅二將者建炎間嘗率峒  
兵出勤王賊曹成入廣西建大旗購二人二人遣健  
兵侏儒者數十輩截髮爲牧童候成兵過自牛背曠  
弩以毒矢射之中者立死成驚懼遁去時盜滿四方  
廣西獨晏然者二將之力也至今南人稱之子孫有

仕於州縣者

黎峒

黎峒唐故瓊管之地在大海南距雷州泛海一日而至其地有黎母山黎人居焉舊說五嶺之南人雜夷獠珠崖環海豪富兼并役屬貧弱婦人服總纒績木皮爲布陶土爲釜器用瓠瓢人飲石汁又有椒酒以安石榴花着甕中卽成酒俗呼山嶺爲黎居其間者號曰黎人弓刀未嘗去手弓以竹爲弦今儋崖萬安皆與黎爲境其服屬州者爲熟黎其居山峒無征徭者爲生黎時出與郡人互市宋至和初有黎人符護者邊吏嘗獲其奴婢

十人還之符護亦嘗犯邊執瓊崖州巡檢慕容允則及軍士至是以軍士五十六人與允則來歸允則道病死詔軍士至是貸其罪紹興三十年廣西運判鄧酢言黎州王文滿結連西峒王承聞等攻破定南寨後復犯省地遂分遣官燒蕩巢穴生擒黎賊王用賓等詔令廣西諸司撫存歸業人戶乾道二年廣西經略轉運司言欲下瓊管及三軍守倅措置說諭黎人示以朝廷德意威命使之自新退復省地能說諭收復者量功立賞任內有侵犯省地或逃失省民亦重責罰其先省民逃居黎峒之人守臣招誘復鄉蠲其逋稅詔從之六年黎人王



用休犯邊萬安權守巡檢孫滋等招諭之遂定九年樂昌縣黎賊劫省民焚官舍瓊管安撫請於朝黎人王用存王承福陳顏等招降復寨有功借補官資彈壓邊面義兵統制黃文廣屢戰有功並欲推賞以澄邁縣巡檢權移駐劄樂昌縣控制黎人其省民久陷歸業蠲賦已責從之淳熙元年詔承節郎王日存等許子孫承襲以瓊州言其祖父居蔭元係入貢又自宣和以來能撫諭諸黎彈壓有勞也八年六月瓊管司言承襲宜人三十六峒統領王氏稱其祖本化外州皇祐熙寧間歸順彈壓三十六峒捍禦隘口正係瓊管咽喉之地三世受朝

廷告命至母黃氏承襲彈壓邊界用寧紹興間又說諭化外黎人各安生業莫肯從亂乾道七年受告封宜人今年老無男有一女欲依例承襲詔王氏襲其後又以王氏之姪黃間補官守寨彈壓黎峒嘉定九年詔復許宜人王氏吳氏承襲

石湖范氏桂海虞衡志曰黎海南四郡隴土蠻也隴直雷州由徐聞渡半日至隴之中有黎母山諸蠻環居四傍號黎人內爲生黎外爲熟黎山極高常在霧靄中黎人自鮮識之久晴海氛清廓時或見翠尖浮半空下猶洪濛也山水分流四郡熟黎所居已阻深

生黎之巢深邃外人不復跡黎母之巔則雖生黎亦不能至相傳其上有人壽考逸樂不與世接虎豹守險無路可攀但覺水泉甘美絕異爾蠻去省地遠不供賦役者名生黎耕作省地供賦役者名熟黎各以所邇分隸四郡皆椎髻跣足插銀銅錫釵腰繚花布執長靶刀長鞘弓長荷槍跬步不捨去熟黎能漢語變服入州縣墟市日晚鳴角結隊以歸婦人繡面高髻釵上加銅環耳墜垂肩衣裙皆五色吉貝無袴襦但繫裙數重製四圍合縫以足穿而繫之羣浴於川先去上衣自濯乃濯足漸升其裙至頂以身串入水

浴已則裙復自頂而下身亦出水繡面乃其吉禮女年將及笄置酒會親屬女伴自施針筆涅爲極細蟲蛾花卉而以淡粟紋徧其餘地謂之繡面女婢獲則否女工紡織得中國綵帛拆取色絲和吉貝織花所謂黎錦黎單及鞍搭之類精粗有差居處架木兩重上以自居下以畜牧婚姻折箭爲定聚會亦椎鼓舞歌親死不哭不粥飯惟食生牛肉以爲哀痛之至葬則昇櫬而行令一人前行以雞子擲地雞子不破處卽爲吉穴客來未相識主人先於隙間窺之客儼然矜莊始遣奴布席於地客卽坐又移時主人乃出對

坐不交一談少焉置酒先以惡臭穢味嘗客客食不疑則喜繼設中酒遂相親否則遣客不復與交會飲未嘗捨刀三杯後各請弛備雖解器械猶置身傍也一語不相能則起而相戕性喜讐殺謂之捉拗所親爲人所殺後見仇家人及其洞中種類皆擒取以荔枝木械之要牛酒銀餅乃釋謂之贖命土產沉水蓬萊諸香漫山悉檳榔椰子木亦產小馬翠羽黃蠟之屬與省地商人博易甚有信而不受欺給商人有信則相與如至親借貸有所不吝歲望其一來不來則數數念之或負約不至自一錢以上雖數十年後其

同郡人擒之以爲質枷其項關以橫木俟前負者來償乃釋負者或遠或死無辜被繫累歲月至死乃已復伺其同郡人來亦枷繫之被繫家人往負債之家痛詬責償或鄉黨率斂爲償始解凡負錢一緡次年倍責兩緡倍至十年乃止本負一緡十年爲千緡以故人不取負其一錢客或誤殺其一雞則鳴鼓告衆責償曰某客殺我一雞當償一鬪一鬪者雌雄各一也一雄爲錢三十一雌五十一鬪每生十子五爲雄五爲雌一歲四產十雞併種當爲六鬪六鬪當生六十雞以此倍計展轉十年乃已誤殺其一雞雖富商

亦償不足容其家無敢損動其一毫閩商值風水蕩去其貲多入黎地耕種不歸官吏及省民經由村洞必舍其家恃以安熟黎之地始是州縣大抵四郡各占隴之一陞其中黎地不可得亦無路通珠崖在隴南陞既不可取徑則復桴海循隴而南所謂再涉鯨波也四郡之人多黎姓蓋其裔族而今黎人乃多姓王生黎質直獷悍不受欺觸不服王化亦不出爲人患熟黎貪狡湖廣福建之姦民亡命雜焉侵軼省界常爲四郡患有王二娘者瓊州熟黎之酋有夫而名不聞家饒財善用衆能制服羣黎朝廷封宜人瓊管

有號令必下王宜人無不帖然二娘死女能繼之其餘三郡強名小壘實不及江浙間一村落縣邑或爲黎人據其廳事治所遣人說謝始得還前後邊吏惴不敢言淳熙元年十月指山生黎洞首王仲期率其傍人十洞丁口千八百二十歸化仲期與諸洞首王仲文等八十一人詣瓊管司瓊管司受之以例詣顯應廟研石歃血約誓改過不復鈔掠犒賜遣歸瓊守圖其形狀衣製上經略司髻露者以絳帛約髻根或以綵帛包髻或戴小花笠皆簪二銀篦或加雉尾衣花織短衫繫花襪裙悉跣足是其盛飾也惟王居則

青布紅錦袍束帶麻鞋自云祖父宣和中嘗納土補  
官賜錦袍云

### 海南序略

海南諸國漢時通焉大抵在交州南及西南居大海中  
洲上相去或三五百里三五千離遠者二三萬里乘船  
舉帆道里不可詳知外國諸書雖言里數亦非定實也  
其西與諸胡國接元鼎中遣伏波將軍路博德開百越  
置日南郡其徼外國自武帝以來皆獻見後漢桓帝時  
大秦天竺皆由此道遣使貢獻及吳孫權遣宣化從事  
朱應中郎康泰使諸國其所經及傳聞則有百數十國

因立記傳晉代通中國者蓋尠及宋齊至者有十餘國  
自梁武隋煬諸國使至踰於前代至唐貞觀以後聲教  
遠被自古未通者重譯而至又多梁隋焉其無異聞亦  
不復更記

### 黃支

黃支國漢時通焉合海日南之南三萬里俗略與珠崖  
相類自武帝以來皆獻見有明珠玉璧琉璃竒石異物  
大珠至圍二寸以下而至圓者置之平地終日不停

### 哥羅

哥羅國漢時聞焉在槃槃東南亦曰哥羅富沙羅國云

其王姓矢利婆羅名米失鉢羅其治城累石爲之城有樓闕門有禁宮室覆之以草國有二十四州而無縣庭列儀仗有燾以孔雀羽飾焉兵器有弓箭刀稍皮甲征伐皆乘象一隊有象百頭每象有百人衛之象鞍有鈎欄其中有四人一人執稍一人執弓矢一人執戈一人執刀賦稅人出銀一銖國無蠶絲麻紵唯出吉貝布畜有牛少馬其俗非有官者不得上髮裹頭又嫁娶初問婚惟以檳榔爲禮多者至二百盤成婚時惟以黃金爲財多者至二百兩婦人嫁訖則從夫姓音樂有琵琶橫笛銅鈸鐵鼓簧吹蠡擊鼓死亡則焚屍盛以金甕沉之

# 大海

## 林邑

林邑國秦象郡林邑縣地漢爲象林縣屬日南郡古越裳之界也在交阯南海行三千里其地縱廣可六百里去日南界四百餘里其南水步道二千餘里有西屠夷亦稱王焉馬援所植兩銅柱表漢界處也

馬援北還留十餘戶於銅

柱處至隋有三百餘戶悉姓馬土人以爲流寓號曰馬留人銅柱尋沒馬流人常識其處林邑國記馬援植兩銅柱於象林南界與西屠國分漢之南境又云銅柱山周十里形如倚蓋西跨重巖東臨大海屈璆道里記又云林邑大浦口後漢末大亂縣功曹姓區有子曰連殺有五銅柱焉

縣令自號爲王子孫相承吳時通使其後王無嗣外孫

范熊代立熊死子逸代立其國有金山石皆赤色其中  
生金金夜則出飛狀如螢火又出瑇瑁貝齒吉貝沉水  
香吉貝者樹名也其華成時如鵝毛抽以績紡作布潔  
白與紵布不殊亦染成五色織爲斑布也沉香者土人  
破斷之積以歲年朽爛而心節獨在置水中則沉故曰  
沉香次不沉者曰棧香也又出猩猩獸爾雅曰肉之美者猩猩之唇  
多琥珀松脂淪入地千歲爲茯苓又千歲爲琥珀又云  
楓脂爲之琥珀在地其上及傍不生草木深者或八九  
尺如大斛削去皮成焉初如桃膠凝成乃堅其金寶物  
產大抵與交阯同以磚爲城蜃灰塗之居處爲閣名曰

干蘭皆開北戶以向日或東西無定尊官有二其一曰  
西郡婆帝其二曰薩婆地歌其屬官三等其一曰倫多  
姓次歌倫致帝次一地伽蘭外官分爲二百餘部其長  
官曰弗羅次日阿倫如牧宰之差也書樹葉爲紙施柳  
葉爲席男女皆以橫幅吉貝繞腰以下謂之干漫穿耳  
貫小環貴者著革履賤者跣行自林邑扶南諸國皆然  
也其王戴金花冠形如章甫加纓絡出則乘象吹螺擊  
鼓罩吉貝繖以吉貝爲幡旗國不設刑法有罪者使象  
蹋殺之林邑浦外有不勞山罪人亦送此山令其自死  
其大姓號婆羅門嫁娶必用八月女先求男由貴男而

賤女也同姓還相婚姻人性凶悍果於戰鬪有弓箭刀  
槩以竹爲弩樂有瑟笛琵琶五弦頗與中國同每擊鼓  
以警衆吹蠡以節戎其人深目高鼻髮卷色黑婦人椎  
髻四時暄暖無霜雪王死七日而葬有官者三日庶人  
一日皆以函盛屍鼓舞導從輦至水次積薪焚之收餘  
骨王則內金罌中沉之於海有官者以銅沉之海口庶  
人以瓦送之於江男女截髮隨喪至水次盡哀而止有  
寡婦孤居散髮至老人皆奉釋法文字同於天竺王事  
尼乾道鑄金銀人像大十圍至晉武帝太康中又來貢  
獻成帝咸康二年逸死奴文篡位奴文昔嘗北至洛陽

商貨因教王作宮室兵車器械王愛信之使爲將乃譖  
王諸子或徙或奔及王死無嗣遂自立爲王乃攻旁國  
并有衆四五萬至穆帝永和三年文率其衆攻陷日南

今郡地

遂據其地告交州刺史朱蕃

交州今安南府

求以日南北

今郡地

橫山爲界初徼外諸國嘗齎寶物自海路來貿

貨賄而交州刺史日南太守多貪利侵侮十折二三由  
是諸國怨憤且林邑少田故貪日南之地文又襲九真

今郡地

害士庶十八九文死子佛立猶屯日南九真太守

灌遂率兵討佛走之遂追至林邑時五月立表日在表  
北影在表南九寸一分自北影之南故開北戶以向日



此大較也佛乃請降其後頻寇日南九德之郡今安南日南郡

界殺傷甚多交州遂至虛弱至佛曾孫文敵後為扶南

王子當根純所殺大臣范諸農平其亂而立為王死子

陽邁立死子咄復名曰陽邁初其父陽邁母始產夢人

邁故為名至咄宋文帝元嘉中侵暴日南九德諸郡宋

德郡今安南日南郡界宋使振武將軍元幹討之克林邑陽邁父

子並挺身奔逃所獲珍異皆是未名之寶又銷其金人

得黃金數十萬斤其後累代自宋齊梁陳皆遣使朝貢

隋文帝既平陳後遣大將軍劉方步騎萬餘人擊之其

王梵志率其徒乘象而戰方多掘小坑草覆其上因以

兵挑之梵志悉眾而陣方偽北走梵志逐之其象多陷

轉相驚駭軍遂亂方縱兵擊大破之遂棄城而走方入

其都獲其廟主十八枚皆鑄金為之蓋其有國十八葉

矣方既平其國班師故地遂空梵志收拾遺人別建國

邑唐武德中再遣使貢方物貞觀時王頭黎獻馴象鏐

鎖五色帶朝霞大火珠其言不恭群臣請問罪帝赦不

問又獻五色鸚鵡白鸚鵡數訴寒有詔還之頭黎死子

鎮龍立獻通天犀雜寶十九年摩訶慢多伽獨弒鎮龍

滅其宗范姓絕國人立頭黎婿婆羅門為王大臣共廢

之更立頭黎女為王諸葛地者頭黎之姑子父得罪奔

乾隆十二年校刊

真蠟女王不能定國大臣共迎諸葛地爲王妻以女永  
徽至天寶三入獻嘗獻火環大如雞卵狀如水晶日正午時以艾藉珠輒火出云得之羅刹國

至德復更號環王元和初不朝獻安南都護張丹執其僞驩愛州都督斬三萬級虜王子五十九獲戰舳鎧

扶南

扶南國在日南郡之南海西大島中去日南可七千里在林邑西南三千餘里其境廣袤三千餘里國俗本裸文身被髮裸郎果反不制衣裳其先有女人爲主號曰柳葉年少壯健有似男子其南有激國人名混潰來伐柳葉降之遂以爲妻惡其裸露形體乃穿疊布貫其首理其

國子孫相傳至王混盤况死國人立其大將范師蔓爲王蔓勇健有權略以兵威伐旁國咸服屬之自號扶南大王開地五六千里蔓死國亂大將范尋自立爲王是吳晉時也土地坳下而平博氣候風俗物產大較與林邑同有城邑宮室國王居重閣以木柵爲城海邊生大若葉長八九尺編其葉以覆屋國人亦爲閣居爲船八九丈廣纔六七尺頭尾似魚國王行乘象人皆醜黑卷髮躑身跣行耕種爲務一歲種三歲獲又好雕文刻鏤食器多以銀爲之出金鋼可以刻玉狀似紫石英其所生乃在百丈水底盤石上如鍾乳人没水取之竟日乃

出以鐵鎚之而不傷鐵乃自損以羚羊角扣之漼然水  
泮貢賦以金銀珠香亦有書記府庫文字類胡吳時遣  
康泰朱應使於尋國國人猶裸唯婦人着貫頭泰應謂  
曰國中實佳但人褻露可怪耳尋始令國內男子著橫  
幅今干漫也大家乃截錦爲之貧者以布又有老鵬入  
海爲玳可以裁作馬勒謂之珂西晉太始太康中皆遣  
使貢獻東晉時有竺旃檀稱王亦遣使其後王姓僑陳  
如本天竺婆羅門也有神語曰應王扶南僑陳如南至  
槃槃扶南人聞之迎而立焉復改制度用天竺法令其  
國人居不穿井數十家共一池引汲之俗事天神以銅

爲像二面者四手四面者八手手各有所持或小兒或  
鳥獸或日月王坐則偏踞翹膝垂左膝至地以白疊敷  
前設金盆香爐於其上居喪則剃除鬚髮人無禮義男  
女恣其奔隨宋齊梁並獻方物隋時其國王姓古龍諸  
國多姓古龍訊耆老言古龍無姓氏乃崑崙之訛隋代  
遣使貢獻唐武德後頻來貢貞觀中又獻白頭國二人  
於洛陽其國在扶南之西在參半之西南男女生皆素  
首身又凝白居山洞之中四面巖嶮故人莫至與參半  
國相接

頓遜

頓遜國梁時聞焉一曰在海崎山上地方千里王並羈

屬扶南北去扶南可三千餘里其國之東界通交州其

西界接天竺安息徼外諸國賈人多至其國市焉所以

然者頓遜迴入海中千餘里漲海無涯岸船未曾得逕

過也其市東西交會日有萬餘人珍物寶貨無種不有

又有酒樹似安石榴採其花汁停酒甕中數日成酒出

藿香插枝便生葉都梁以裊衣國有區撥等花十餘種

冬夏不衰日載數十車貨之其花燥更芬馥亦末爲粉

以傅身焉其俗又多鳥葬將死親賓歌舞於郭外有鳥

如鷺口鸞鷁而紅色飛來萬許家人避之鳥食肉盡乃

去燒其骨沉海中以爲上行人也必升天鳥若廻翔不食其人乃自悲復以爲已有穢乃更就火葬以爲次行也若不能生入火又不被鳥食以爲下行也

毗騫

毗騫國梁時聞焉在頓遜之外大海洲中去扶南八千

里傳其王身長丈二尺頭長三尺自古來不死莫知其

年其王神聖知將來事南方號曰長頭王國俗有室居

衣服噉粳米其人言語小異扶南國不受估客有往者

亦殺而噉之是以商旅不敢至王常樓居不血食不事

鬼神其子孫生死如常人惟王不死又傳扶南東界卽

乾隆十二年校刊

漲海海中有大洲洲上有諸薄國國東有馬五洲復東  
行漲海千餘里有燃火洲其上有樹生火中洲左近人  
剝取其皮紡績作布極得數尺以爲手中與蕉麻無異  
而色微青黑若小有垢汚則投火復更精潔毗騫王亦  
能作天竺書書可三千言說其宿命所由與佛經相似  
並論善事

### 干陀利

干陀利國在南海洲上其俗與林邑扶南畧同出斑布  
吉貝檳榔特精好爲諸國之極宋孝武世王釋婆羅那  
隣陀遣長史竺留施獻金銀寶器梁天監元年其王瞿

曇脩跋陀羅以四月八日夢一僧曰中國今有聖主十  
年之後佛法大興汝若遣使貢奉禮敬則土地豐樂商  
旅百倍若不信我則境土不得自安初未之信旣而又  
夢此僧曰汝若不信我當與汝往觀乃於夢中至中國  
拜覲天子旣覺心異之陀羅本工畫乃寫夢中所見武  
帝容質飾以丹青乃遣使并畫工奉表獻玉盤等物使  
人旣至摸寫帝形以還其國比本畫則符同焉因盛以  
寶函日加禮敬後跋陀死子毗針邪跋摩立十七年遣  
長史毗員跋摩奉表獻金芙蓉雜香藥等普通元年復  
遣獻方物

按干陀利王夢僧所言一段南史夷貊傳所載杜氏通典削之蓋梁武好佛之志通於華夷適干陀利以其時入貢佞臣黠僧遂立此說導之以納諂非事實也島夷朝貢不過利於互市賜予豈真慕義而來諷以希旨宜無不可况所謂瞿曇脩跋陀羅者本佛之徒亦欲其教之行於中土又安知其不自神其說以中帝之欲乎越裳氏所以贊武王周公者梁武豈足以當之哉

### 狼牙脩國

狼牙脩國在南海中其界東西三十日行南北二十日

行北去廣州一萬四千里土氣物產與扶南畧同偏多棧沉婆律香等其俗男女皆袒而被髮以吉貝爲干漫其王及貴臣乃加雲霞布覆胛以金繩爲絡帶金環貫耳女子則布以纓絡繞身其國累塼爲城重門樓閣王出乘象有幡旄旗鼓罩白蓋兵衛甚嚴國人說立國以來四百餘年後嗣衰弱王族有賢者國人歸向之王聞乃枷囚執其鎖無故自斷王以爲神不敢害乃逐出境遂奔天竺天竺妻以長女俄而狼牙王死大臣迎還爲王二十餘年死子婆加達多立梁天監十四年遣使阿撒多奉表

婆利國

婆利國在廣州東南海中洲上去廣州二月日行國界東西五十日行南北二十日行有一百三十六聚土氣熱如中國之盛夏穀一歲再熟草木常榮海出文螺紫貝有石名甘貝羅初采之柔軟及刻削爲物暴乾之遂大硬其國人披吉貝如屨及爲都縵乃用斑絲者以纓絡繞身頭著金冠高尺餘形如弁綴以七寶之飾帶金裝劍偏坐金高坐以銀蹬支足侍女皆爲金花雜寶之飾或持白毘拂及孔雀扇王出以象駕輿輿以雜香爲之上施羽蓋珠簾其導從吹螺擊鼓王姓憍陳如自古

未通中國問其先及年數不能記自言白淨王夫人卽其國女梁天監十六年遣使奉表獻金席等普通三年其王頻伽復遣使珠智獻白鸚鵡青蟲堯熬瑠璃器吉貝螺杯雜香藥等數十種其國有舍利鳥通人言俗黑身朱髮而卷鷹爪獸牙穿耳傅璫以吉貝一幅繚於腰以夜爲市自掩其面隋大業中又遣使入貢其王姓刹利邪伽名護路那婆唐貞觀中又遣使朝貢其東卽羅刹也與婆利同俗隋煬帝遣常駿使赤土遂通中國赤土西南入海得婆羅總章二年其王旃達鉢遣使者與環王使者偕朝環王南有珠奈者汎交阯海二月乃至

與婆羅同俗貞觀二年使者上方物九年甘棠使者入朝國居海南十二年僧高武令迦乍鳩密四國使者朝貢僧高直水真臘西北與環王同俗其後鳩密王尸利鳩摩又與富那王尸利提婆跋摩等遣使來貢僧高等國永徽後爲真臘所并

### 槃槃

槃槃國梁時通焉在南海大洲中北與林邑隔小海自交州船行四十日至其國其王曰楊栗翬音栗翬父曰楊德武連以上無得而記百姓多緣水而居國無城皆豎木爲柵王坐金龍牀每坐諸大人皆兩手交抱肩而

跽

九暨反

又其國多有婆羅門自天竺來就王乞財物王

甚重之其大臣曰敦郎索濫次日曰崑崙帝也次日曰崑崙

敦和

胡卧反

次日曰崑崙敦帝索甘且其言崑崙古龍聲相

近故或有謂爲古龍者其在外城者曰那延猶中夏刺

史縣令其矢以石爲鏃稍則以鐵爲刃有僧尼寺十所

僧尼讀佛經皆肉食而不飲酒亦有道士寺一所道士

不食酒肉讀阿脩羅王經其國不甚重之俗皆呼僧爲

比丘呼道士爲貪宋元嘉孝建大明中並遣使貢獻梁

中大通元年四年其王使使奉表累送佛牙及畫塔并

獻香物十種六年復遣使送菩提國舍利及畫塔圖并



菩提樹葉詹糖等香隋大業中亦遣使朝賀

### 赤土國

赤土國扶南之別種也在南海中水行百餘日而達所都土色多赤因以爲號東波羅刺國西婆羅娑國南訶羅日國北拒大海地方數千里其王姓瞿曇氏名利富多塞不知有國遠近稱其父釋王位出家爲道傳位於利富多塞在位十六年矣有三妻並隣國女也居僧祇城有門三重相去各百許步每門圖畫菩薩飛仙之象懸金花鈴眊婦人數十人或奏樂或捧金花又飾四婦人容飾如佛塔邊金剛力士之狀夾門而立門外者持

兵仗門內者執白拂夾道垂素網綴花王宮諸屋悉是重閣北戶北面而坐三重之榻衣朝霞布冠金花冠垂雜寶纓絡四女子立侍左右兵衛百餘人王榻後作一木龕以金銀五香木雜鈿之龕後懸一金光焰夾榻又樹二金鏡鏡前並陳金甕甕前各有金香爐當前置一金伏牛前樹一寶蓋蓋左右皆有寶扇婆羅門等數百人東西重行相向而坐其官薩陀迦邏一人陀拏達又二人迦利密迦三人共掌政事俱羅末帝一人掌刑法每城置那邪迦一人鉢帝一人其俗皆穿耳翦髮無跪拜之禮以香油塗身其俗敬佛尤重婆羅門婦人作髻

於項後男女通以朝霞朝雲雜色布爲衣豪富之室恣  
意華靡唯金鎖非王賜不得服用每婚姻擇吉日女家  
先期五日作樂飲酒父執女手以授壻七日乃配既娶  
卽分財別居唯幼子與父居父母兄弟死則剔髮素服  
就水上構竹木爲棚棚內積薪以屍置上燒香建幡吹  
蠡擊鼓以送火焚薪遂落於水貴賤皆同唯國王燒訖  
收夾貯以金瓶藏於廟屋冬夏常溫雨多霽少種植無  
時特宜稻稌白豆黑麻自餘物產多同於交趾以甘蔗  
作酒雜以紫瓜根酒色黃赤味亦香美亦名椰漿爲酒  
隋煬帝嗣位募能通絕域者大業三年屯田主事常駿

虞部主事王君政等請使赤土帝大悅遣齎物五千段  
以賜赤土王其年十月駿等自南海郡乘舟晝夜二旬  
每日遇便風至焦石山而過東南詣陵伽鉢拔多洲西  
與林邑相對上有神祠焉又南行至師子石自是島嶼  
連接又行二三日西望見狼牙脩國之山於是南達雞  
籠島至於赤土之界其王遣婆羅門鳩摩羅以舶三十  
艘來迎吹蠡擊鼓樂隋使進金鎖以纜船月鑷金合二  
枚貯香油金瓶八枚貯香水白疊布四條以擬供使者  
盥洗其日未時那邪迦又將象二頭持孔雀蓋以迎使  
人并致金盤金花以藉詔函男女百人奏蠡鼓婆羅門

二人導路至王宮駿等奉詔書上閣王以下皆坐宣詔  
訖引駿等坐奏天竺樂事畢駿等還館又遣婆羅門就  
館送食以草葉爲盤其大方丈因謂駿曰今是大國臣  
非復赤土國矣後數日請駿等入宴儀衛導從如初見  
之禮王前設兩牀牀上並設草葉盤方一丈五尺上有  
黃白紫赤四色之飮牛羊魚鼈猪蝸蝓之肉百餘品延  
駿升牀從者於地席各以金鐘置酒女樂迭奏禮遺甚  
厚遣那邪迦隨貢方物并獻金芙蓉冠龍腦香以鑄金  
爲多羅葉隱起成文以爲表金函封之令婆羅門以香  
花奏蠡鼓而送之旣入海見綠魚羣飛水上浮海十餘

日至林邑東南並山而行其海水色黃氣腥舟行一日  
不絕云是大魚糞也循海北岸達於交趾駿以明年春  
與那邪迦於弘農謁帝帝大悅授駿等執戟都尉那邪  
迦等官賞各有差

文獻通考卷第三百三十一

北京師範大學圖書館藏



